

Roma

Paulo Aposolo Uratainane Kine

¹ Paulo, na Kristo Yesu wane urata nei, so aposolo, Anutuŋo enjine don maepkine ea ra qe-
lanikalane ra wakon nange.

² Don Maine ea mokaka Anutuŋo nenane binjek
qeke, ea enjine propetkoune edangi, enjine Pa-
pia Kobekine yewao qekoi, ³ Ea yemo enjine
Gipole, nenane Waomze Yesu Kristo, enjine enjine
solarop wako wakon yemo Dawit wane qe-
akineŋo wakonge. ⁴ So enjine koto qelajan
maratka more Asurop gege yewaŋo Anutu wane
Gipole gemaike, ea wane kine seu seu njine
ma wirikkaki wieke, yewao wakonge. ⁵ Enjane
raki paki, Anutuŋo wet menaŋ okannane more,
aposolo urata ninge. Kristo wane enjine binjekine
ra suawe paki, kepe banjem nei njerep korop iwen
onbe, done dere malipkau paki, aŋa tewekkei
wane. ⁶ Yewa Roma kepeo gemami, njine yaleka
tego yewao takotkemami, njine Anutuŋo Yesu
Kristo wane binjek okanikei wane njidora waraŋ
njunge.

⁷ Eso ea wane Roma matko nei njerep korop
gemami, njine Anutuŋo wet maep okan njunmaike,
so enjine nei njerep magu okangei wane njidora
waraŋ njunge, njinane kibi iwa qemaile.

Anutu nenane Magaze so Waom Yesu Kristoŋo
wet pese so peam maine njibongep.

Bakom Kito Kito Meje Mejen

⁸ Mikepka, na njinane korop rawe paki, Yesu Kristo wane enjetko Anutune bakomine kitomaile, yemo onoka wane mida, kepe banjem jei njerep korop eje njinane mali malip njinane don kisiine detmami, ea wane. ⁹ Anutuño kine maine ma wakoniake, na don iwa ramaile, yemo welekatne. Na asunenjo korop Anutu wane urata mamaile, yemo Gipolane Don kisi Maine ea ra edanmaile. Anutuño detmaike, na naso banjem njinane enjetjine njidora menjenka okanmaile. ¹⁰ Naso banjem na menjenka okanmaile, yemo na olatpe, Anutuño detki menangi njado numa lotkeki, na maine iwa njinano sari njunikale. ¹¹ Na zok njine njunikalane nanmaike, yemo more koto njinane don mosop mane njibonbe ma togolejungi togolekei. ¹² Na ramaile, yemo njine so na wenen naso wekuoka qesinj nagukene, nanjane mali malipeño njine qesinj njuniake, no njinane mali malipno na qesinj naniake.

¹³ Kima kopne, njine yewa detlukkei, atakine atakine njinano sari njunikalane wetke mankole, no silun kine kine natneño luknangi, mi sari njun mankole. Na uratanane welene njinane keunjino wakoniakane nanmaike, jei natne enjano mawe wakon okanmaike, yale. ¹⁴ Na sotane jei njerep korop enjano pamaike, Grik jei so jei natne, jei dereret korop so jei qelan. ¹⁵ Eso ea wane na Don Kisi Maine ea Roma kepeo gemami, njinano yalewaka ra njidanikalane qomne ewekmaike.

Mali Malip Wane Ra More Gege Maratkakene

¹⁶ Na Miti Don Maine ea wane detpe, gamu gamuinerop mi okanmaike, onoka wane, eamo

Anutu wane zonom, nei korop eje detluke malipkau, rokop ebuki menangei, lewine yemo Yuda nei so Grik nei yaleka. ¹⁷ Miti Don Maine yewano Anutuño nei enino koboine biraon okanmaike, ea wane kine ma wakon okanmaike, eamo mali malipko ñine kieke wakone ariki, kutno qoeake. Anutu wane Papias iwa yale ramaike, ea wane rokop, “Ñei mane eje Anuturop koboboin mali malipinerop geake, eje gege togon marat kayake.”

Ñei Eje Anutu Nadekkau Paki Panaman Koto Ketkoi

¹⁸ Anutu wane sot osi osiine yemo didiwo qeliwo ñine ket more, nei eje borikine korop mau paki, sot korop okanbi, gegeene bori worine yewano don wele yewa desikei wane mogatki ari okanmaike. ¹⁹ Anutuño makoboe on okanmaike, yemo onoka wane, nei eje Anutu wane kineine ea maine detmami, ea yemo Anutu eje onomka wetene malotkeki detkoi. ²⁰ Mokaka Anutuño kepe ma wakonge, enine kineine mi kakaine, gege togon zomine so enine wetine wenej ma wakongi eje didiwo kakoi. Ea wane nei eje Anutuño yeye kine kine ma wakonge, ea wane kine maine mi ñañækei! ²¹ Eje Anutu detkamami, ño siluñ eje Anutu ewine mi kitomami, ea yemo enane biñek, me bakomine mi kitomami. Yale okangei wane, turuñine yemo enane derereteneño zok qelañine okange, so wet dereretene yemo korop panamanño watkewareke. ²² Eje ramami, eje dereretenerop, ño siluñ eje qelañ qemami. ²³ Anutu gege wane welaine mi

meñen kakei wane, turuñine yemo eñe lopio ñei oña mamaine, me nañi oñaine me osom berek, me koma eñane oña oñaene ea meñenon okangoi.

Ñei Eñe Anutu Qeliñkau Paki Kine Kine Mado Madoñine Okangoi

²⁴ Onoka wane ñei eñe yale okangoi wane, Anutu eñe one ñadekongi, weteneño borikine mado madoñine yau yaup mau paki, koto solaene korop matali kawarekoi. So ñei eñe borikine kine kine gamuinerop makoi, ñeiño ñei yewa turuñine turuñine okan nagukoi make. ²⁵ Eñe Anutu welekatne welaine ñadekkau paki, isi ea qom kakoi. Eñe Anutu añañeño raki wakongoi, ea eñe meñenongoi so qelitene qekoi. Eñe Ma wakon Mawokonze eñine ewino mi kitokoi. Anutu eñe weku yemo bakom mawa mawa okankakei, naso bañem, weleka.

²⁶ Onoka wane ñei eñe masi tanik iwa okangoi, ea wane Anutuño qikongi, eñe masi tanik gamuinerop eaño kuteno wake. Ñerep eñe yaleka ñao ñanom gege ea wane numa Anutuño ra motke, yewa qeyau more solaene mi oka okane yewa okangoi, ñerepño ñerep kimaine maki masi borikine ma okanmami. ²⁷ Numa yewaka ñei eñe ñao ñanom gege yewa waluke qeligeu paki, kotoeneño borikinane gerep suaine zeki, eñe edomka borikine kine mane mi oka okan, ea ma wakongoi. Ñei eñe masi tanik gamuinerop yewa eñe edomka okan nagukoi. Eso eñe masi tanik borikine yaline okangoi, ea wane turuñine eñe edomka koto so sola matali matali ea marat kakoi.

28 Onoka wane ɲei eɲe Anutuɲo eɲine dereret wele yewa leweteno more ma gekei wane ebonge, ea walukkoi, ea wane eɲe qeliɲongi enɲene dereretene borikine yewa mogare gekoi, paki eɲe masi tanik borikine mi oka okane, yewa okan-goi. 29 Eɲane kotoeno yemo borikine kine kine qotkoine yewaɲo korop watke wareke. Masitanik qotkoine, wetɲo bailalaɲ, kaɲ baksua so ɲaba ɲaba, sori sorinɲo kotoeno watwale, ɲei engu matali onbi seu seuk, kawali qeɲe, isi bela so ɲei matali. 30 Eɲe sigi qeu paki, don borikine edomka au au, eɲe Anutu ɲabaka ɲabaka, don suaine rara, wawaine so sola mawa mawa, eɲe borikine koso manerop makeiwane numa ma wakon ma wakon, nabok magak eɲane aɲa bira wira. 31 Eɲe wet dereretene midaine, eɲe don ra okanmami, ea mi tewek okanmami, so eɲe ɲei natne wet pese me wet borikene ea mi sikanon okanmami. 32 Eɲe Anutu wane ra rokop donɲo ramaike, ɲei ɲerep numa yaline gekei, eɲe seu seu marat kaikei, ea mo detmami, ɲo siluɲ eɲe masi tanik yewaka takotke okanmami, eɲe ɲei natneɲo tanik yewa okanbi, eɲe siluɲ koti qesiɲ okanon okanmami.

2

Anutu Wane Wanok Wanok Yemo Koboboine

1 Kimane, ge ɲei natne eɲane solaeno qenom paki, wanok wanok urata mamaine me? Ge mane maɲo sotɲone maine mi motkekene. Ge ɲei natne eɲane kineene ra wakonnom paki, eɲe okanmami, ge masi yewaka siluɲ okane more, ge goɲomka kineɲone ma wakonmaine. 2 ɲene

detmaine, Anutuño ñei masi tanik yaline ma okanmami, eñano wanok wanok urata koboine ma okanmaike. ³ Ño ge nañane kimane, ge masi tanik mide, iwa goñomka okan wardenom paki, ñei natne eñeka kineene ma wakoniake, yale mane misuk raikene! Ge wetke ramaine, ge bañ Anutu wane kine ma wakon ma wakon ea bañ kaka kaikene me? ⁴ Me ge eñane wet pese, peam maine, zok kakapa suaine okangangi paki, lolongane geki, ge dere qewolon okane gemaine. Welekatne ge mo detmaine Anutu eñe wet pese okanganmaike, yemo onoka wane mida eñe goño wetñone maingekenane raki, pa iwen-gane gemaike. ⁵ Ño siluñ ge wetñone togogole mi zinge zingine ma gemaine, eso yalinane ge goñomka turuñine marat kaikenane dupuke wa magenom, kakapa suaine okangi, naso suaine yewao Anutu wane sot osi osi, so kine ma wakon ma wakon koboine bañ wakongi gaeake. ⁶ Anutu eñe bañ ñei korop gege mageene okane ma gekoi, ea wane rokopko turuñine eboniake. ⁷ Ñei natne eñe urata maine tako rakot mauluke mamami paki, qeli ewe zonom so bakom mawa mawa, so gege maep marat kaikei zuañmami, eñe yemo bañ Anutuño gege togon eboniake. ⁸ Ñei natne enñenaneka wetke ge okanmami, so don wele ea ñadekkau paki, masi tanik borikine ea mogare gemami, eñane kuteno yemo bañ Anutu wane sot osi osi so busuño qatki wayake. ⁹ Pakimo borikine ma okanmami, ñei yewa korop eñano yemo bañ umat so wikile wakon oniake. Lewine Yuda ñei so Grik ñei yalewaka. ¹⁰ Ño siluñ Anutu

enje banj qeli ewe zonom, bakom mawa mawa, so peam, yemo nei korop urata maine mauluke makoi, yewa eboniake, lewine Yuda nei ebone mo, Grik nei yaleka eboniake. ¹¹ Anutu enje nei gege magekenane rokopko turuņine eboniake.

Ra Rokop Don Ea Mo Kotozo Geke

¹² qelanj nei Mose wane ra rokop don mi ma gemami, enje borikine mau paki, ra rokop don midaine siukwarekei. Yuda nei enje ra rokop don ma gemami, enje borikine mau, ra rokop donņo kineene ma wakongi, turuņine eboniake. ¹³ Ra rokop don ketņoka dere qewolonj okanmami, nei yaline enje Anuturop nei koboine mi gekei, ra rokop donņo ramaike, yewa keteneņo dere teweke ma okanmami, nei yaline edoka Anuturop nei koboine gekei. ¹⁴ Qelanj nei enje ra rokop don mi ma gemami, ņo siluņ enje enņene wetenane ra rokop donņo raki, dere teweke okanmami wane rokop okangei, yemo enje edomka ra rokop don okangei. Enje rara togon mi ma gemami, ņo siluņ yale okanmami. ¹⁵ Enjane okane mama eneņo sikan ņonmaike, yemo ra rokop donņo edangi teweke oka okan, yemo mo Anutuņo kotoeno geke, wane enņene weteneņo yaleka kine sikan ņonmaike, iwa yemo welekatne, enņene weteneņo naso natno wet qelot okanon okanmaike, so naso natno ra kitaton okan okanmaike. ¹⁶ Eso yalinane, na Miti Don Maine ra okanmaile, ea wane rokopko banj aso qoeki, yewao wakoniake, yemo Anutu enje banj Yesu Kristo talekaki, nei wetņo kine kine sanko wetke ma gemami, enjane kineene ma wakon wareake.

Mose Wane Rara Togon Donjo Yuda Njei Qe-sinjonikane Me Mida?

¹⁷ Ge daleo? Ge goŋomka eŋetŋone Yuda njei aranagu maine, ge ra rokop dongo makatake okoranom paki, na Anutu wane kine detlukmaile ra, sola mawa mawa okan okanmaine. ¹⁸ Ge kine kine onokaka makenane, Anutuŋo wetke ginmaike, ea ge mo detmaine, so ge ra rokop don mo detkonane, masi koboboine ea wane ganmaike. ¹⁹ Paki ge iwa yale detmaine, ge de pilik maine numa alakane ebonikene, so panaman koto gemami, eŋane kiwa okan qelaŋan onikene. ²⁰ So njei wet qelaŋine, eŋe maine edan ma koboe okan onikene, so medep nigatne wet gemami, eŋane kito ebon ebon okanikene, ge mo detlukmaine, ge ra rokop don gorop ea wane dereret so don wele ea wat watko pa ginmaike. ²¹ Ge njei natne kito edan okanmaine, ŋo geŋone mo onoka wane mi kito alat nagu okanmaine? Ge njei edan ra okanmaine, “Kobu misuk makei,” ŋo ge goŋom siluŋ kobu ma okanmaine. ²² Ge ra okanmaine, “Ŋao ŋanom ŋire zokit misuk kitasikeik,” ŋo goŋom siluŋ zokit kitat okanmaine? Ge lopio ŋadek kamaine, ŋo ge siluŋ lopio urumgo ŋine kine kine kobu ma okan maine? ²³ Ge na Anutu wane ra rokop don magemaile ranom paki, mawa nagu okan maine, ŋo ge siluŋ eŋane ra rokop don qe barakenom paki, Anutu wane kutno gamu mot okanmaine me? ²⁴ Ea wane Anutu wane papiao iwa yale ramaike, “Onoka wane Yuda njei ŋinane ra more qelaŋ njei eŋe Anutu wane eŋetine qotkoine ora okanmami.”

Asu Wane Kibi Nei Kotoo Paki Wele Rakene

²⁵ Ge ra rokop don tewekkeneo, yemo solanone kita kitatne yewano welerop okaniake, no ge ra rokop don yewa dere nadekkeneo, yemo sola nono kibi kitatkone, yewa wele midaine okaniake. ²⁶ No nei qelan mane ene solaine kibi mi kitatke, no silun ra rokop donno ramaike, yewa tewekeakeo, ene Anutuño ban solaino kibi kitatke yale orayake? ²⁷ Eso yalinane Yuda nei nine ban qelan nei edo kinejine tilekkei, onoka wane nine ra rokop don yewa qe barakkoi, nine ra rokop don qekoi yewarop gemami, so solanino kibi mo kitatkoi, no ene yemo solaene kibi mi kitatkoi, ea wane. ²⁸ Manjo Yuda nei welekatne okanmaike, welekatne solaino kibi kitatkeno me? Solanoka Yuda nei gemaikene, enane solaino kibi kitatke onjo Yuda nei wele mi okanmaike. ²⁹ Wetno Yuda nei gege, eano Yuda nei wele okanmaike, eamo enane kotino kibi mo kitatke, ea yemo Anutu wane Asu wane urata, ea ra rokop don kibiwo qeqine, ea wane urata Midakaka. Nei iwa ene Anutuño mawakayake. Nei edo mi mawakaikei.

3

Wawaineno Anutu Wane Don Maine Mi Make-siake

¹ Pakimo Yuda nei ene qelan nei daleo yuanongei? Me solao kibi kita kitat yewao nine onokaka maine mane wakon okanmaike? ² O, Yuda nei ene qelan nei yuan onmami. Kine kine numaine numaine zok manerop wakon okanmaike! Lewine alakane Anutu ene enine

donine Yuda ɲei ware kakeiwane sunonge.
³ Yuda ɲei natne eɲe don yewa mi detluke magekoiwo yemo daleo? Eɲe yale okangoiwo yemo yewaɲo Anutu wane ra togole ra togole donine yewa ma kesiake me? ⁴ I Midakaka! Anutu eɲe don welekatne ra okanmaike, ɲo ɲei korop eɲe isi okanmami, ea wane Anutu wane papiao iwa yale ramaike,
 “Me don raraɲone eaɲo koboine okangi, ge don uangene eɲe dongo biraganbi.”

⁵ No ɲenane masi tanik borikine oka okanze yewaɲo siluɲ Anutu wane tanik manik koboine oka okanine ea didiwo ɲe wakon maikeo yemo daleo okaniake? Nene daleo maine raikene? Anutu eɲe ma koboeɲon okanmaike yewa eɲe sot okanmaike me? (Na don iwa ɲei edo okan okanmami ea wane rokop ramaile.) ⁶ I Midakaka! Anutu eɲe koboine mida ra yemo eɲe daleo kepe baɲem ɲei ɲerep kineze maine ma wakongirap?

⁷ No siluɲ nat paromine yemo naɲane isi donne ɲo Anutu wane kibiɲelanaɲ qesiɲka more maki eɲane don wele ea wie manerop didiwo sua ariakeo, yemo daleo okaniake? Pakimo na siluɲ onoka wane borikine mane nora more turuɲine nin okanmaike? ⁸ Pakimo ɲene onoka wane iwa yale mi ramaine. “Nene borikine maɲem ma tanik manik maine sarikep?” Na don mide iwa ramaile ea wane ɲei natne eɲe welekatne naɲane ramami, oɲo yale ramaike rau paki naɲane detpi boriki sigine qemami! Neni iwa eɲe baɲ turuɲine wikile eboniake yemo menageake.

Nei manenjo koboboine migemaik.

⁹ Eso maine, ɲene Yuda ɲeiŋo qelan ɲei yuan one more rokop mane gemaine me dale? Weneɲ Midakakamde! Na mo mikepka sikan ɲunile yemo Yuda ɲei so qelan ɲei eɲe kineene wekuka, eɲe korop borikinane bano waket more qelitime qeokamami. ¹⁰ Ea wane Anutu wane papiao iwa yale ramaike,

“Nei manenjo koboboine mi gemaikē, ¹¹ ɲei manenjo dereret korop mi gemaikē, me manenjo Anutu kayakane mi zuanƙa okanmaikē. ¹² Nei korop eɲe Anutu qeliƙa qeyau ariwarekoi, eɲe korop ɲei borikine okan warekoi, weku manenjo maine mi okanmaikē. ¹³ Eɲane aɲaene yemo deɲesere mumuine borikine okoramaikē, ea yale, isi borikinenjo belakamene wali walik pisemaikē, so don seu seuinerop, koma wane ɲet sopetne borikine yale, pienjoine saket okanmaikē, ¹⁴ Aɲaeno soa tabainenjo watkemaikē. ¹⁵ Eɲe ikopka engu matalionbi seukkei, ¹⁶ eɲe yewao yewao arikei, rokop qeliɲonbi waru so kowon qetusiake. ¹⁷ Eɲe peam wane numa mane mi pa ebongeɪ, ¹⁸ me eɲe Anutu wane kaetoniakane kine mi detkoi, so ewine mi kitokoi.”

¹⁹ Nene mo detmaine, don korop ra rokop dongo ra waremaikē, yemo ɲeiwa ra rokop don wane bano gemami, eɲane ramaikē, ea yemo ɲei wet ea ma wongeakane, so kepe banem ɲei ɲerep korop waranɲongi sari, Anutu wane kine tile tilek ea wane bango waket warekei. ²⁰ Nei manenjo ra rokop don teweke ge mage more, Anutu wane

kaitko koboine mi okorayake, ra rokop don yemo enje nei sot okange yewa sikankaki, ka detkayake, ea wane.

Anutuŋo Nei Ebu More Enjino Koboine Biraonge

²¹ No iwa yemo Anutuŋo nei enjino koboine biraongi gekei wane, numa mo tingo Yesu wane kutka ma wakonge, ŋo yewa enje ra rokop donka mogare, gege numa yewao, Midakaka, ra rokop don so propet enje numa koboboine ea wane don kisiine ra qelaŋangoi. ²² Anutuŋo nei enje Yesu Kristo detlukkau paki malipkakei, ea wane nei koboboine edorayake. Anutu enje masi iwa yemo neiwa korop diawa edo Kristo malipka gemami, enje okanoniake, onoka wane kineine etkeka mi pamaike, Midakaka. ²³ Nei korop borikine ma warekoi paki, Anutu wane ebu ebu kibi qelaŋanine yewa kakale kau paki, abaran ari warekoi. ²⁴ No siluŋ Anutu qomine rarainane seseone more, wet menaŋine yewa lewine midaine, yaup enje korop ebu more, Kristo Yesuŋo borikino ŋine siwot ongane, enjane raki paki, enjino koboine biraonge. ²⁵ Anutuŋo seukeakane ra mangane, enje gegeine qaisik kaki, wenjemenjo nei korop enje detlukakei, enjane borikineenane turuŋ saukki siukke. Anutu enje masi yewa okangi paki, tanik manik koboboine ea wane kine ma wakonge. Mo alakan yemo enje loloŋone more, nei enjane borikineene yewa qeliŋgi pake. ²⁶ Wane naso iwao yemo, enje nei enjane borikineene ea ka modare enjine masi tanik koboboine ea wane kine ma wakonge. Enje numa yaleoken okangi paki, Anutu oŋom koboboine

gemaïke, ea wane kine sikanonge paki, eje ñei natne Yesu malip kamami ea ebuki koboboine okanmami.

²⁷ Pakimo maine ñene ea wane mawa nagukene? Midakaka, eso iwa wane kine yemo dalino? Ñene ra rokop don tewekmaine, kine ea me? Mida, ño yemo ñene detluke malip kamaine yewaño. ²⁸ Ñene ramaine, yemo ñei eje mali malipinane weku ra more, koboboine Anutu wano biraka okanmaïke, eso ra rokop donño raki teweke okanmaïke, ea wane mida. ²⁹ Me eje Anutu weku Yuda ñei eñane Anutuka mane? Eje qelan ñei eñane Anutu yaleka mida mane gemaïke? O, eje eñane Anutu weneñ gemaïke. ³⁰ Anutu eje wekuku, wane eje ban Yuda ñei mali malipenane raki paki, eñinerop koboine biraoniake, so qelan ñei eje yaleka mali malipenane raki paki, eñino koboine biraoniake. ³¹ Ñene iwa okanmaine, eamo mali malipño ra rokop don rasi qokki ketmaïke, yale okanmaïke me? Midakaka, yale mida, ea wane turuñine ñene ra rokop don mañem wie okorakep!

4

Abrahamño Mali Malip Wane Numa Gesoke Ñebonge Yewaka Gesokkene

¹ Abraham, ñenane solaoken qerakze, ñene eñane daleo raikene? Eje daleo okange? ² Eje tanik manik maine okangi Anuturop koboboine birakakeo, yemo eje ea wane maine eñine mawa nagukirap. Ño siluñ eje Anutu wane kaitko mi mawa naguke. ³ Ea wane Anutu wane papiao

yale ramaike, “Abraham enje Anutu detlukkake, so onoka wane mida, mali malipine ea wane raki paki, Anutu enje detkaki, nei koboboine okange.”

⁴ Nei mane urata mayake, enje lewine golekaikei, lewine golekamami, ea enje yaup wet pese wane bakom okan kamami, mi okanmaike. Ea yemo enje urata mamaike, ea wane lewine okanmaike.

⁵ Njo nei mane enje mali malip mageake, enje urata mi mayake, enje Anutuŋo nei borikine mama raki, sotene midaine okanmami, enje detluk kayake, yemo enje mali malipine ea wane raki paki detki, koboboine okangi, enjinerop birakaki geake.

⁶ Dawit enje Anutuŋo nei mane urata natne mi mama geki, Anutuŋo wet pese okankaki paki, nei koboboine ra more mayake, ea wane enje wet pese desiake, don iwa yale rake,

⁷ “Wet pese desikei nei yewa enjane borikineenane turuŋine Anutuŋo qelige ebonge, enjane borikineene mataliki siukke! ⁸ Wet pese desiake nei ea wane borikineine Waomŋo ban mi motki payake!”

⁹ Nei wetpese desikei wane don, Dawit enje rake, yewa enje neiwa solaene piwitne kitatko enjane rake me? Mida, eamo enje neiwa solaene piwitne mi kita kitatne enjane wenen rake. Nene Anutu wane papiao don iwa yale detmaine, “Abraham enje Anutu detlukkake, so onoka wane mida, enjine mali malipinane raki paki, Anutuŋo detkaki, nei koboboine yale okange.” ¹⁰ Naso diawao iwa wakonge? Iwa enje alakan me njado Abraham solaine piwitne kitatke naso yewao? Iwamo alakan wakonge, njado solaine piwitne

kitatkoi, yewao mida. ¹¹ Eɛe solaine piwitne ɛado kitatkoi, pakiso eɛane sola kita kitatine, yewano yemo oɛa oɛa, eano kine qe wakonge, onoka wane mida, Abraham wane mali malipinane ra more, Anutuɛo detkaki, eɛe alakan ɛei koboboine okangi, ɛado eɛe solaine piwitne kitatkoi, eso ea wane Abraham eɛe lewine alakane, ɛeiwa korop diawa edo Anutu detluk kamami, eɛane magaene okange paki, Anutuɛo detki menangi, eɛe solaene piwitne mi kita kitatneɛo siluɛ detongi, eɛe ɛei koboboine okangei. ¹² Eɛe yaleka ɛeiwa solaene piwitne kita kitatne, eɛane magaene weneɛ okanmaike, onoka wane eɛe solaene piwitne kita kitatne ea wane mida, ɛo yemo iwa yale wane, eɛe gege wekuka mali malip korop gekei, ɛenane magaze Abrahamɛo olakan gege geki, ɛado solaine piwitne kitatkoi, yale.

Anutu Wane Don Yemo Mali Malip Wane Ra More Wele Maratkaikene

¹³ Anutuɛo Abraham eɛine so doko ɛosakoune mali malip weneɛ qeli so kepe suaine ea eɛane leleakane biɛek qe more edange warekaikei. Don iwa edange, yemo onoka wane Abrahamɛo ra rokop don tewekkane mida, ɛo yemo eɛe detlukaki, ea wane raki paki, Anutuɛo detkaki, ɛei koboboine okange. ¹⁴ Anutuɛo ra rokop don tewek okanmami, eɛe biɛek qe eboniakane don edangirap, yemo ɛei eɛane mali malipɛo wele midaine okangirap, pakimo Anutu wane don sap saune okangirap. ¹⁵ Ra rokop donɛo Anutu wane sot osi osi tebakaki sariake, ɛo ra rokop don mane

yewa mi payakeo, yemo ra rokop don dere njade njadek, ea mi payake.

¹⁶ Biņek qe more don eda edan, ea yemo mali malipņo pekeine motke, ea wane biņek qe qe don, ea yemo Anutu wane bakom lewine midaine Abraham wane doko njosakoune korop eņane biņek okan waremaike. Ra rokop donka dere tewekmami, nej yewa eņaneka mida, ņo yemo nejwa diawa edo Abrahamņo okange, yale detluk kamami, eņane wenej okanmaike. Abraham yemo eņe mali malip korop nēnane magaze okanmaike. ¹⁷ Ea wane Anutu wane papiao iwa yale ramaike, “Na kepe banem nej loutne eņane magaene geukole.” Eso ea wane biņek qe qe don, ea yemo Anutu wane kaitko maine okanmaike, Abrahamņo eņe detlukkake, Anutu oņo nej seu seune eņe gege ma wakone ebon okanmaike, so eņane donņo raki, kine kine mi wakongoi, yewa wakon wareake. ¹⁸ Abraham eņe dere qekaki paki, siluņ ea detlukkake, so ea wane dereret geke, eso eņe yale okangi paki, “Kepe banem nej korop eņane magaene okange.” Anutu wane papiao don iwa yale ramaike, ea wane rokopko, “Geņane doko njosokopņone eņe ban iwa serekin magu yale loutne manerop okangei.” ¹⁹ Eņe komaine mo wan handret (100) maratka yakane okange, ņo siluņ eņine mali malipineņo mi pelekke, naso eņe solaine zokongi, solainane wetkekeo, me Saraņo medep mi ebuke, yewao. ²⁰ Eņine mali malipineņo mi qeliņkake, so eņe Anutu wane biņek qe qe don olatke, ea wane wet etkeka mi okange, eņine mali malipineņo zonom

qewatkake, pakiso eje Anutu mawakake. ²¹ Eje Anutuño binjek qe more don olatke, ea maine ban okaniake, ea mo detlukkake. ²² Abraham eje yale okangane, mali malipinane raki paki, “Anutuño detkaki, eje ñei koboboine okange.” ²³ Donba “Eje detkaki, ñei koboboine okange,” ea yemo enjaneka bonep mi qekoi. ²⁴ Eje ñenane yaleka weneñ qekoi, ñene eje Yesu Waomze seu seuo ñine ma wirikkaki wieke, eje detluk kakeneo, eje detñongi, ñene ñei koboboine okangene. ²⁵ Eje seukeakane sunka ebonge, onoka wane ñenane borikinane ra more, so eje ma wirikkaki wie more birañongi, Anuturop ñei koboboine gekenane, yale okange.

5

Anutuño Ñei Koboboine Eñinerop Gekenane Birañonge

¹ Anutuño ñene mali malip wane ra more, sot midaine koboboine eñerop gekenane birañongane, ñene peamgo Anuturop Waom Yesu Kristo wano makatake gemaine. ² Eje mali malipzane raki paki ñebu more, gege mage wawaine iwa Anutu wane qom pesek kotino birañongane, ñene ukude Kristorop makatake gemaine, ea wane ñene oi bakom okañem paki, Anutu wane qeli ewe zonom ea makenane, dereret okane gemaine. ³ So ñene yaleka oi bakom okan maine, wikile kine kinezane kotino gemaine, onoka wane ñene iwa yale detmaine, wikile kine kine yewaño togole togole ma leule

okanmaike. ⁴ Togole togoleŋo waraŋkaki, Anutuŋo liwe liweko ma togole qe togole ŋebu ŋebu ea sariake paki, eŋane ma togole qe togole ŋebu ŋebu, yewaŋo yemo qeli wane dereret gege yewa maki wakoniake. ⁵ Qeli wane dereret gege eaŋo ŋebuki mi gamu ŋoniake, onoka wane Anutu eŋe eŋine wet maepine Asu Koboboine ŋebonge, oŋo qakki kotozo ketwareke, ea yemo Anutu wane bakom, lewine midaine ŋebonge.

⁶ Nene zonomze midaine, ge sari mageŋem, Anutuŋo naso motke, yewa bomileki, Kristoŋo borikine zane turuŋine seukke. ⁷ No ŋene kepe ŋei kine iwa yale ŋei maneŋo ŋei koboboine mane wane raki paki, maine seukŋem rap. No ŋei qotkoine wane ra more, ŋene maine mi seukkene. ⁸ No Anutuŋo yemo siluŋ wet maep zok manerop okanŋon okanmaike, ea wane kine sikan ŋonge, ea yemo ŋene borikine mamaka geŋem, Kristoŋo ŋenane turuŋze maki paki seukke! ⁹ Eŋane seu seuineŋo ŋene ŋebu more, koboboine iwa Anuturop biraŋonge paki, ŋene baŋ oŋo manerop Anutu wane sot osi osiwo ŋine makok ŋoniake. ¹⁰ Nene Anutu wane ŋabakoune okane gekone, ŋo eŋe siluŋ eŋine Gipolane seu seuinane raki paki eŋine dokokoune ŋebuke, wane iwa yemo ŋene Anutu wane dokoine okanmaine paki, ŋene baŋ koso manerop Kristo wane gegeineŋo ŋebuki menaŋgene! ¹¹ No siluŋ yewaka mida, ŋene Waomze Yesu Kristo wane raŋem paki, Anutu oi bakom okan kaikene, oŋo ŋene ŋebuki, Anutu wane dokoine okanmaine, ea wane.

Adam Wane Ra More Seukmaine Kristo Wane

Ra More Gege Maratkakone

¹² Borikineño kepeo ñei weku eñane ra more wakonge paki, eñane borikineño seu seu weneñ warańka sarike, pakiso seu seuneño ñei korop eñano rokopkeke, onoka wane ñei korop eñe borikine ma warekoi. ¹³ Kepeo borikine mo alakan wakone paki, ra rokop don yewa ñado ebonge, ño ra rokop donño yewao mi pakane borikinane turuñine kibi mane mi more sakoi. ¹⁴ No Adam wane nasoo yewao ñine sari mage, Mose wane nasoo gemaıke, yemo seu seuño ñei korop yuan one more ebu ket wareke, ñei natne borikine mi makoi, eñe Adamño okange yale, Anutu wane ańaine birakoi, ñei yewa eñe siluñ seu seuño yuan one more, ebu ket wareke.

Adam eñe ñei mane ñado sari lotkeake, eñane ońa ońaine. ¹⁵ No siluñ ñei etke yewa ere rokopetne wekuka mida, onoka wane Anutu wane bakom lewine midaine, yewaño Adam wane borikine ea wane rokop mi okanmaıke. Ñei loutne seuk warekoi, yewa yemo welekatne, onoka wane ñei weku eñane borikinane seuk warekoi. No siluñ Anutu qom borikine i zok manerop kakapa suaine pamaıke, so bakomine lewine midaine yaleka, yewa ñei weku Yesu Kristo wane qom borikinane makone. ¹⁶ Eso ea yemo kineetne kine mane kine mane okanmamik, Anutu wane bakom, so ñei weku borikine make, ea wane masi. Ñei wekuño borikine maki, ea wane ñadino, “Sot korop,” ea wane kine ma wakon ma wakon ea sarike. No borikine loutne makoi, ea wane ñadino yemo Anutu wane bakom siu suikine midaine, “Sot Midaine,” ea wane kine

sarike! ¹⁷ Iwa yemo welekatne nei weku wane borikine ea wane ra more, seu seuᅇo kieke more, nei waom okange, onoka wane nei weku yewa eᅇane sot wane. Nᅇo siluᅇ nei weku Yesu Kristoᅇo urata make, yemo zok kakapa! Nei korop Anutu wane qom borik wat watko pamaike, so bakomine lewine midaine, eᅇinerop koboboine gege, yewa mau eaᅇo baᅇ Kristo wane raki paki ware ᅇungi, gege togon ge arikei.

¹⁸ Eso ea wane borikine weku, eaᅇo nei korop bori wori wane numao biraonge, numa weku eaka nei wekuᅇo masi tanik koboboine okange, eaᅇo nei korop siwoton wareki paki, gege ebonge.

¹⁹ Nei wekuᅇo aᅇa biraki, sot eaᅇo nei korop ebuki, borikine mama okanwarekoi. Numa weku yewaka nei wekuᅇo aᅇa tewe tewek okangane, ea wane ra more, nei loutne eᅇe baᅇ koboboine Anuturop biraongi gekei.

²⁰ Ra rokop don wakonge, eamo borikine mama eaᅇo suayakane, ᅇo siluᅇ borikineᅇo sua ariki, yewaoka Anutu wane qom borikeᅇo zok manerop sua kakapa lele arike. ²¹ Eso yalinane borikineᅇo seu seu nei waom okankake, ea wane rokopka Anutu wane qom borik, eaᅇo koboboine gege ea wane ra more nei waom okangi paki, iwen ᅇongi, gege togon matko Yesu Kristo ᅇenze Waom zane ra more arikene.

6

Borikinane Seukkone Nᅇo Kristo Wano Wisikae Gekene

¹ Pakimo ᅇene daleo raikene? Nene borikine kotinoka takotke geᅇem, Anutu wane qom

borikŋo maine baŋ sua ariake? ² Yale Midakaka! Nene borikinane seukkone, ŋo daleo ŋene koso ea wane kotino takotke ge arikene? ³ Njine welekatne iwa detpi, ŋene miti doku taukone naso yewao Kristo Yesu wano takotkekone, ŋene miti doku taunem paki, eŋane seu seuino wenenj takotke seukkone. ⁴ Nene doku tau more, Kristorop wenenj seukkone, paki Anutuŋo eŋerop dukeŋonge, ea yemo Magak wane qeli ewe zonomine qelaŋan gorop, yewaŋo Kristo seu seuo njine ma wirikkaki wisikae wieke, rokop yaleka ŋene maine gege musele mane gekene.

⁵ Nene eŋerop makatake weku okane, eŋe seukke yale seukkoneo, yemo numa weku yewaka ŋene baŋ eŋerop makatak nagu weku okanjem, eŋe okange yale, ma wirikŋongi wisikae more wiekene. ⁶ Nene iwa yale detmaine, njenane tanik manikze sogine ea mo Kristorop qeki eŋane kibego seukke, ea yemo borikinane zonomŋo rokop ŋonge, ea qe mataliki maine siukeakane paki, ŋene koso borikinane qelit qege manerop mi qekenane yale okanŋonge. ⁷ Nei mane seukeake, eŋe borikinane zomngo njine siwotkaki ariake. ⁸ Nene Kristorop wenenj seukkoneo, yemo ŋene yale detlukkene, ŋene baŋ eŋerop wenenj yaleka gekene. ⁹ Nene mo detmaine, Kristo eŋe seu seuo njine ma wirikkaki wisikae wieke wane, eŋe baŋ mane mi seukeake. Seu seu eŋe zonomine manerop mi pamaikane, mi maket birakayake. ¹⁰ Seu seu ea eŋe seukke, yemo borikine atakine atakine makone, ea wane eŋe atak weku seukki qoeke, eso eŋe gegewa iwa gemaikae, yemo eŋe Anutu wane ra more

gemaiké. ¹¹ Numa weku yewaka njinjinane yaleka wetkekei, yemo borikinane seukkone, yale okanmaike, No wisika gege yemo Anutu wane, Kristo Yesurop geturañ nagu gemaine, yale okanmaike.

Borikinane Qelit Mi Qekene

¹² Borikineño solanjine siu siukinerop, iwao ñei waom okan ñuniakane raki, misuk detkakei me solanjineño borikine makei wane rikuk ñungi, ea misuk detkakei. ¹³ Me kie mete solanjine natne kine kine qotkoinane mi qebinkau borikinane qelit qeake, ea wane turujine yemo ñine Anutu wane uratao waket warekei, paki seu seu ñine ma wirik ñungane, kie mete solanjine Anutu sunkau, kine kine maine koboboine ea wane qelit qeake. ¹⁴ Borikineño ñine ñei waom misuk okan ñuniake, ñine ra rokop don wane bango mi gemami, midaka, ñine Anutu wane qom borik ea wane bango gemami.

Qelit Qeqe Koboboine Okane Gekene

¹⁵ Ea wane ñene daleo okangene? Nene maine borikine makene, onoka wane ñene ra rokop don wane bango mi gemaine, ñene Anutu wane qom borik wane bango gemaine me? Ea Midakaka! ¹⁶ Njine iwa yale mo detmami, ñine koto solanjine qelinjau, ñei mane wane qelit qeqe okane añaine tewekeake, yemo ñine mo ñeiwa añaine tewek okanmami, enjane qelit qeqe okanikei, borikinane qelit qekeiwo, weleine seu seu maratkekei, me añã tewe tewek okangeiwo, ea wane weleine yemo ñei koboboine birañungi, Anuturop gekei. ¹⁷ No bakom kito kito yemo Anutu wane okangep!

Onoka wane naso maneo n̄ine borikinane qelit qe qe okangoi, n̄o siluŋ n̄ine koso koto n̄ine so korop Anutu wane don wele maratka makoi, ea dere tewekmami. ¹⁸ N̄ine borikino n̄ine siwotŋungi, koboboine gege ea wane qelit qe qe okangoi. ¹⁹ Na n̄ei n̄enze wet dereretze pamaike, eaka mogare don iwa ramaile, yemo onoka wane wet dereretn̄ine pelekakatne pamaike, ea wane. Naso maneo n̄ine wetn̄ine so solan̄ine qeliŋkau, kine kine diinerop so qotkoine ea wane qelit qe qe okangoi, ea yemo qotkoinane. Rokop yalewaka n̄ine ukude koton̄ine so solan̄ine korop qeliŋkau, koboboine gege ea wane qelit qe qe okaniake, ea yemo koboboinane.

²⁰ N̄ine borikinane qelit qe qekoi, naso yewao koboboine gege ea wane mulap mane mi pa n̄ibonge. ²¹ N̄ine naso yewao kine kine okane gekoi, ea wane wele onokaka maratkakoi, ukude masi yewa wane n̄ine gamu gamune okanmai? Masi kine kine ea wane wele yemo seu seu! ²² Siluŋ ukude yemo n̄ine mo borikinane mulapko n̄ine siwotŋunge, ea wane n̄ine Anutu wane qelit qe qe okanmami, n̄inane wele n̄ine maratkamami, yemo wet kunene n̄ine gege, ea motpi enanoka wat watko payake, paki ea wane weleine yemo gege togon maratcakei. ²³ Borikinane lewine yemo seu seu makene, n̄o Anutu wane bakom lewine midaine ea wane wele yemo gege togon maratka more, Kristo Yesu n̄enane Waom en̄erop tako rakot ge arikene.

Asu Wane Numa Muselo Gekene

¹ Kimakopne, na rakalane okanmaile, ea njine mo detlukmami, onoka wane njine koropņo Mose wane ra rokop don wane kine mo detmami. Ra rokop donņo nej mane eņe wisika geake rokop warekaki, ea wane bango geake. ² Nerep mane ņaonerop, eņe ra rokop don eaņo ņaone wisika geakeo, yemo ņaonano makatakkaki geake. No nej seukeakeo, yemo nerep eņe ra rokop donņo nej wano makatakkake ea mo siwotkaki, mulap midaine okanmaike. ³ No nerep eņe ņaone wisika geki, nej mane mayakeo, yemo nerep ea zokit kita kitat orakei, no nerep ea eņe ņaone seukmaikeo, yemo eņe ra rokop don eaņo mi makatak kayake, eņe siwot kaki, mulap midaine geake, paki eņe nej mane mayakeo, yemo eņe zokit mi kitasi-ake. ⁴ Eso kimakopne, njine yaleka Kristo wane solainerop ra rokop don wane seukkoi, wane ukude yemo njine mo eņane biņek okanmami, eņe seu seu njine ma wirikkaki wisikae wieke, ea wane njene weleze maine Anutu wano wako-niake. ⁵ Nene gege sogine gekone, naso yewao ra rokop donņo nenano borikine makenane simile qotkoine motki, eaņo nenane solaze korop rokopke urata mawareke, paki njene seuke mida sololokke, ea wane wele marat kawarekone. ⁶ Ea wane ukude yemo njene ra rokop donņo koso manerop mi makatak ņonmaike, mo siwot ņonmaike, onoka wane njene seukkone, yemo atak maneo ra rokop donņo makatak ņongi, mulap nej okangone, ea wane. Nene ukude yemo, ra rokop don sogino qeqine numa ea koso manerop mi mamaine, njene Asu wane numa musele ea

mamaine.

Rara Togon Don So Borikine

⁷ Ea wane njene daleo rakene? Ra rokop don ea onjomka borikine? Ea Midakaka! No silun ra rokop don eaŋo nolatkimo borikine pamaike, eamo na detmaile. Ra rokop donŋo gom riwe riwe wane don mane mi raki rap, “Ge nej kimakopnjone enjane toran abonenane gomnjone mi riwe magekep.” Yale mi raki rap, yemo na ea wane mane mi detpe rap. ⁸ Borikine ea yemo, ra rokop donŋo nagaine mere qesiŋkaki, wet dereretne rikukkaki, gom riwe riwe kine kine loutne wetno wakon okanmaike. Ra rokop donŋo mi paki rap, yemo borikine enje siu siukine paki rap. ⁹ Na noŋom sogino ra rokop don midaine gekole, naso yewao wisika gekole, ŋo ra rokop don sarike, naso yewao yemo borikineŋo wisikae wieke. ¹⁰ Pakiso na seukkole, so ra rokop donŋo gege ma wakoniakane raraine, eamo na iwa yale kamaile, seu seu ma wakonge. ¹¹ Borikineŋo nago nagongo rabidan geki paki, ra rokop don wane ra more isinange paki, borikineŋo nekuki seukkole.

¹² Eso ea wane yemo iwa yale, ra rokop don enjineka yemo sigeine, so ramatok don enje sigeine, koboboine, so maine. ¹³ Pakimo daleo, kine kine maine iwaŋo nekuki seukkole me? I Midakaka! Ea yemo borikineŋo yewa okange, borikine kineine wakon lukeakane, don maine eaŋo tingo wakongi, borikine eaŋo waraŋkaki seu seu nanano sari wakonge. Ea yemo borikine

qotkokoine ea wane kineine didiwo wakoni-akane, yale okange. Pakiso ra rokop donjo borikinane kine sikan nonmaike, yemo zok qotkokoine manerop.

Kie Meteze So Wet Solaze Korop Borikinejo Mat Urum Mawareke

¹⁴ Nene iwa yale detmaine, ra rokop don yemo Asu wane piwitne, no na yemo kepe wane piwitne, ea wane borikinane qelit mama yale biranangoi. ¹⁵ Na kine kine okanmaile, ea wane kine mi detmaile, na yeye mane makalane nangi, mi ma okanmaike, no siluj ea wane tungo yemo qikka okanmaile, yewa ma okanmaile. ¹⁶ Na yeye mane makalane, walukmaile, walukewe yewano sikan nonmaike, yemo ra rokop donjo maine, ea wane na detpe weleka okanmaike. ¹⁷ Eso yalinane na weku nonom kine kine iwa welekatne mi okanmaile yemo borikine kotonu pamaike, eano rikuknangi ma okanmaile. ¹⁸ Na detmaile, masi koboboineno nanane kie meteno so koto solano mat urum ma mi gemaika. Nei dereret eanoka pamaika. Yeye kine kine maine ea okangalane wetke okanmaile, no na maine nanamaika ea okanmaile. ¹⁹ Na tanik manik maine okangalane det okanmaile, ea mi okan okan maile. Ea wane tungo yemo masi tanik qotkoine, mi okangalane detokanmaile, yewa okan okanmaile. ²⁰ No na masi tanik mane mi oka okane, ea okanmaileo, yemo kine iwa yale wakonmaika. Na nonom masi tanik yewa mi okanmaile. Midakaka. Yemo borikine kie meteno so wet solano rokopke pa waremaika, yewano okan okanmaika.

²¹ Eso yalinane na kawemo, ra rokop don iwa eje urata mamaike, na tanik manik maine okangalane rawe, eaka qotkoineno wakonnan okanmaike. ²² Nañane qomneño yemo Anutu wane ra rokop don yewa dere simile okan okanmaile. ²³ No siluñ na kawemo, ra rokop don kine mane eaño nañane kie meteno so wet solano urata mawaremaike, ra rokop don mane yewa eaño Anutu wane ra rokop don simile nañane wet dereretno pamaike, earop kawali yaku more, ñaba nagumamik. Paki eaño neu luknane more, borikinane ra rokop don, eaño solane korop rokopke ware urata ma okanmaike, yewaño mulapko biranan okanmaike. ²⁴ O, na ñei wet pesene midaine! Ñei maño solane iwaño neu seu seu bira naniakane makok naniake? ²⁵ Anutu bakomine kitomaile, Waomze Yesu Kristo wane ra more mo siwot nange!

Iwa yemo nañane tanik manik, na nonjomka yemo, na maine Anutu wane ra rokop donka weku wet dereretneño qelitine qeki qekika, nae solaneño eaka borikinane ra rokop don ea wane qelitine qe okanmaike.

8

Asu Wanoñine Gege Makone

¹ Kristo Yesurop weku qeturage gemami, borikinane turuñine, ñei yewa eñano iwa mi wakoni-ake. ² Ea wane asu wane ra rokop don, eaño yemo Kristo Yesurop qeturage wekugege, ea warankaki sari ñebonge, yewaño na borikine so seu seu wane ra rokop dongo ñine siwotnange.

³ Ra rokop donɔ ea maine mi okangi rap, yemo onoka wane ɲei ɲenze kepe tanik manikze sogine, eaɲo ra rokop don qeki ketke, Anutuɲo okange, eɲe borikinane turuɲine ɲei ɲenane raki paki, eɲine Gipole wemedep weku biraki ketke, oɲo sari borikine mama ɲenane sola tanik mage more borikinane turuɲine seukke. ⁴ Anutu eɲe iwa okange, yemo ra rokop don koboboine eaɲo ɲenane kotozo watkeki, ɲene Asu wane tanik manik wane rokopko gekenane yale okanɲonge, ɲei ɲenze kepe masi tanik qotkoine yewarop gekenane mida. ⁵ ɲei gege sogine ea waneka motpi pamaike, ɲo ɲei diawa edo Asuɲo edangi ea wane rokopko gege gemami, eɲane wet dereretene yemo Asuɲo okangei wane ramaike, ea waneka motpi pamaike. ⁶ ɲine wet dereretɲine sozi gege ea wane more gekei, ea wane weleine seu seu maratkaikei, ɲo wet dereret ɲine Asu waneka more gekei, ɲine ea wane weleine gege togon so wet pesek maratkakei. ⁷ Eso yalinane ɲei mane eɲe wet deɲeretine sozi gege ea waneka wetke geake, eɲe Anutu ɲabakayake, onoka wane eɲe Anutu wane ra rokop don ea dere mi tewekmaike, ea wane so eɲe maine ɲaɲaemaik. ⁸ ɲei gegeene sogine ea teweke magemami, eɲane Anutuɲo detki mi menageake.

⁹ ɲo ɲine siluɲ gege magenɲine sogine eaɲo raki ea wane rokop mi gemami, Anutu wane Asuɲo ɲinane kotoɲino gemaik, yemo ɲine Asuɲo ramaik, ea wane rokop gemami. ɲei mane Kristo wane Asu mi ma gemaik, eɲe eɲane ɲei biɲek mi geake. ¹⁰ ɲo Kristoɲo ɲinane kotoɲino gemaik, yemo ɲinane solanɲine ea baɲ seukeake yemo

onoka wane borikinane turuņine, ŋo siluņ Asu eaņo yemo ŋinane gege ŋine ŋibonmaike, onoka wane ŋine Anutu wano koboboine bira ŋunge, ea wane. ¹¹ Anutu wane Asu oņo Yesu seu seuoņine ma wirikkaki wisikae weike, oņo ŋinane kotoņino mere kito okanmaikeo, yemo eņe Kristo seu seuoņine ma wirikkaki wisikae wiekeņo baņ kotoņino Asuine gemaike, eņane raki paki sola ŋine seu seune ea yaleka gege ma wakone ŋebongi wisikae geake.

*Asurop Okane More Anutu Wane Njerep Medep
Lele Gekene*

¹² Ea wane, kimakopne, ŋene sotaze weneņ pamaike, eamo ŋei gege mageze sogine eaņo raki, ea wane rokop gekenane mida. ¹³ Ŋo ŋine gege magenine sogine eaņo raki ea wane rokop gekei, yemo ŋine baņ seukkei. Ŋo ŋine Asu wane zonomgo tanik manik ŋine borikine ea qeu seuk wareake, yemo ŋine baņ wisika ka ge arikei. ¹⁴ Anutu wane Asuņo kito qesiņ okanongi gemami, ŋei yewa eņe Anutu wane gipolekoune. ¹⁵ Asu Anutuņo ŋibone ge, eaņo qelit qeqe mi ŋibu okanmaike, so eaņo kaet mi ma wakone ŋibon okanmaike. Yale okan ŋuniakane tungo yemo Asuņo ŋibuki, Anutu wane gipolekoune okanmami, so Asu wane zonomgoka ŋene Anutu arokka ramaine, “Magaze, magaze! ¹⁶ Anutu wane Asuņo ŋenane asuzo takotkeki paki wetzo motki, ŋene Anutu wane dokoine gemaine, ea detkamaine. ¹⁷ Ŋene eņane dokoine gemainane, ŋene baņ Anutu wane mosop wane weleine ŋei njerep magukoune eņane warekaki pamaike, ea

wane welaine okangene. So nene ban Kristorop wenen enane binjek Anutuño warekaki pamaike, ea wane welaine yaleka okangene, nene Kristo wane wikile yewao wenen takotke desikeneo, nene ban enane qeli ewe zonomine qelanjango enerop yaleka wenen gekene.

Ban Nado Nene Qeli Ewe Zonom Suaine Maratkakene

¹⁸ Na detmaile, nene naso iwa gemaine yewao wikile detmaine, ea korop qeli ewe zonomine qelajan nado tingo ma wakone neboniake, earop maine mi rokop osikene. ¹⁹ Yeye kine kine kepe so qeli koto ma wakon onge, ene korop qomene din tajanjan qeki, Anutuño dokokoune tingo ma wakon oniakane tomaka pamami. ²⁰ Yeye kine kine qeli so kepe ma wakon onge, ene korop seuke mida sololok okangei wane rake, enene simileenane mida, onoka wane no yemo Anutuño yale okangei wane detke, kop yewa wakon onge no silun iwa wenen detke. ²¹ Yeye kine kine qeli so kepe ma wakon onge, ene edomka naso maneo maine seuke gotot wane qelit qeqe ea wane mulapko nene siwot naguwi rap, paki Anutu wane dokoine enerop qeturage qeli ewe zonom qelajan mulap midaine yewao takotkekei. ²² Nene detmaine, Anutuño yeye kine kine ma wakon wareke, ene mo qei ninka wikile dere sari mageu, ukude naso iwa gemaine yewao qemaiké, wikile yemo neren maneno medep ma mayakane wikile detmaike, ea wane rokop. ²³ Silun yeye kine kine ma wakon onge, ea edoka yale mi okanmami, nene Anutu wane Asuine lewine bakom

yale makone, ηene yaleka dokoine gemaine, ea wane kine Anutuηo solaze ma siwotηongi paki ma wesakeakane toma ge more, wetzeno wikile detmaine. ²⁴ Nene ea tomaka gekone, ea wane eηe koso ηebuke, ηo ηene yeye mane wane tomaka ge more wele kakeneo, yemo koso ηado wele kaikenane mi tomakakene. Nei maηo yeye wele deineno kaki pakimo, koso kayakane tomaka geake? ²⁵ No ηene siluη yeye mane wele mi kakeneo, yemo ηene bororom ea wane toma kaikene.

²⁶ Numa weku yewaka, Asuηo ηei set pelek zane yaleka sari qesiηηon okanmaike. Nene mi detmaine, onoka wane meηenkaikene, ea wane Asu oηomka ηenane Anutu meηenka more, don saηep ηeiηo mi qeqine, ea qe okanmaike.

²⁷ Pakimo Anutu eηe ηei koto baηem potki ketki ka okanmaike, oηo Asu wane wet wane kine ea detmaike, onoka wane Asuηo Anutu eηine ηeikoune eηane Anutu meηen kamaike, so Anutu eηine simile ea mogare okanmaike.

²⁸ Nene detmaine, Anutuηo yeye kine kine koprop ma okanmaike, yemo mainane, ηei wet maep okanka okanmami, eηe ma menaη oniakane. Nei yewa edora newan oniakane detki pakane edora newan onge. ²⁹ Anutuηo ηeiwa mo alakan ma wesakonge, yewa eηe yaleka eηine Gipolane rokop okangei wane matokonge, wane Gipoleηo ηolekoune loutne eηane keueno lewine kisageake.

³⁰ Eso Anutu eηe ηei alakan ma wesakonge, eηe edora newanonge, so ηeiwa edora newanonge, eηe yaleka eηinerop koboboine gekeiwane biraonge. Eηinerop koboboine gekei wane bi-

raonge, ɲei yewa eɲe yaleka eɲine qeli ewe zonomine qelaɲan, ea ebonge.

Anutu Wane Qom Borikɲo Kristo Yesu Wano Zok Pake, Ea Wane Kine Kine Maneɲo Eɲane Metoɲine Mi Makokɲoniake

³¹ Anutuɲo masi korop iwa make, ea ka more ɲene daleo maine raikene? Anutuɲo kima okanɲon maikeo, yemo maɲo ɲaba ɲoniake?

³² Eɲe yaleka eɲine Gipole mi mawalukkake, siluɲ ɲeneka korop sunka ɲebonge! Eɲe eɲine Gipole sunka ɲebonge, wane eɲe yeye kine kine natne korop lewine midaine baɲ mi ɲeboniake me?

³³ Anutuɲo ɲei ɲerewekoune ma wesak ɲonge, eɲe maɲo dongo bira ɲoniake? Anutu oɲomka ‘sotene midaine,’ ɲedoramaike!

³⁴ Wane ɲei maneɲo maine turuɲine ɲeboniakane done ɲedaniake? Midakaka! Kristo Yesu eɲe wekuɲo seukke, me koso ma wirikkaki wisikae wieke, paki Anutu wane wonino metmaike, eɲe Anutuɲo qesiɲ ɲoniakane olat okanmaike!

³⁵ Pakimo maɲo me onokakaɲo Kristo wane wet maepkoɲine maine mapok ɲoniake? Umatɲo maine ea okaniake, me wikile wikileɲo, me ɲengu kitoɲo, bodiɲo, me aboɲ midaine gegeɲo, me ɲetne ɲetneɲo, me seu seuɲo? Ea Midakaka! ³⁶ Ea wane Anutu wane papiao iwa yale ramaike,

“Geɲane ra more ɲene kaiwe kiroine seu seu wane ɲetno biraɲonmami, ɲene lama ebu ari more engumami, yale okan ɲonmami.”

³⁷ Midaka, yeye kine kine umatne iwa ea wane kotine Kristo eɲe wet maep okan ɲongane, ɲene umat korop qe more yuanka okanmaine! ³⁸ Na

detlukmaile, kine kine manenjo Kristo enane wet maepkonjine maine mi mapok njonake. Seu seujo, me kepe gegenjo, me anelono, me qeli nei waom natne edo, me zonomno, iwa gemaineno, me ndado gekene eano, ³⁹ me kine kine weti qeliwo njine, me qela Satan wane kepe bano njine, yeye kine kine korop ma wakon onwareke, ea njine maneno banj mane mi eweke more, Anutu wane wet maep yewa nenane binjek, Kristo Yesu nenane Waomze enane ra more okan njonge, ea njine mapokjon lukeake.

9

Anutujo Yuda Nei Nerep Magukoune Mawesakonge Enane Paulojo Qom Wikile Detke.

¹ Na Kristo wane nei, so na isi mi ramaile, na don iwa ramaile, yemo welekatne. Nanane wetne Asu Koboboinejo warekaki paki, yaleka ma qelanane nolatmaikane, na isi mi njidanmaile, don welekatne ea iwa yale, ² na qom borik detmaile, yemo zok kakapa, Yuda nei nerep magukopne enane qomne wikin nanmaike, tako rakot nae sola bikumne so wenem sotakne! ³ Enane rawe paki, na maine Anutu wane soa bano waketpe paki, Kristo qelinjakalane eweke rap. ⁴ Ene Anutujo Yuda nei nerep ma wesake bira onge, enane nei nerep magu. Ene enjine dokoine ebuke, so enjine qeli ewe zonomine ene wenenj ebonge, ene enerop tako rakot okangoi, paki ra rokop don ebonge, ene bakom mawa mawa wele makoi, ene Anutu wane binjek don ea mawarekoi. ⁵ Ene Yuda njosa wili wilikopene njene enano njine wakongoi,

eso enjane tego ea njine Kristo enje nei sola ma more wakonge. Onjo yeye kine kine korop qeli so kepe pamaike, ea wane Waom okane wareon waremaike, ea wane Anutu maine bakomine kitokene, naso banjem naso banjem! Weleka.

Mali Malip Korop Eje Anutu Wane Magu

⁶ Na Anutu wane binjek don yewa wele mi wakonge, yale mi ramaile, onoka wane Israel magu enje koropka Anutu wane maguka mi ma wesakonge. ⁷ Me Abraham wane njosa wili wilikoune enje koropka Anutu wane dokoine mi okangoi. Anutuño Abraham alakan don iwa yale olatke, “Isak wane doko njosakoune edoka, ban wakon onbe, gejnane binjek okanikei.” ⁸ Don ea wane kine yemo iwa yale, njerep medep solanjoka Abraham wano wakongoi, enje Anutu wane njerep medep mi okangei, ea wane turunjne yemo, Anutu wane don ra togoleke, ea wane weleine njerep medep wakongoi, ea edoka Abraham wane njosa wili wilikoune wele okangoi. ⁹ Anutu donine iwa yale ra motki pake, “Naso motmaile, yewa bomileki, na ban koso zinge sariwe, Sara enje medep mane ban mayake.”

¹⁰ So weku iwaka mida, Rebeka wane gipolletkine ere magaetne wekuka, njenane qerakze Isak. ¹¹ Ere nagaetne kotino njine wakone, kine kine maine me qotkoine mane mi okanbik paki, nagaetne kotinoka metpik, Anutuño Rebeka olale rake, ¹² “Medep suaine onjo njole nigatne enjane qelit qeake.” Anutu enje don yale raki, ere ban njado atiksipo wakongoik, ea wane Anutu wane don wele okaniakane okange. ¹³ Ea wane Anutu

wane papiao iwa yale ramaike, “Na Yakop wane similenange, ʊo Esau wane baune wake.”

¹⁴ Ea wane ʊene daleo raikene? Anutu ʊe masi maine mi okanmaike me? Yale Midakaka. ¹⁵ ʊe Mose olale rake, “Na ʊei mane lolonkawe ra, ban lolon kakale, so ʊei mane wet pese okan kawe ra, na ban wet pese okan kakale.” ¹⁶ Ea yemo ʊei wane similane, me urata mamainane mida, yemo Anutu wane wet pese, ea wane. ¹⁷ Ea wane Anutu wane papiao Parao iwa yale olatmaike, “Na kine iwa yale wane ge ʊei waom bira gangole, na geʊano zonomne ma qelanʊbe, ge nanane zonom yewa sikan onikene, paki ʊet biʊekne ranom sua ariki kepe banem ʊei korop ʊe desikei.” ¹⁸ Eso ea wane Anutu ʊe ʊei mane lolonkawe ra, lolonkayake, paki ʊei mane wetne ma siukewe ra, ma siukeake.

Anutu Wane Sot Osi Osi So Wet Pesek

¹⁹ Ninano ʊine maneo ban iwa yale nolale rayake, “Kine yale pamaikeo, yemo Anutu ʊe onoka wane ʊei wane sot ea wane detki bori okanmaike? ʊei maʊo Anutu wane simile ea ge esopkayake?” ²⁰ Kimane, ge maʊo silun Anutu don maine mainge olasikene? Gola qakatakʊo mamaine, eaʊo ʊei gola make, ea mi olale rayake, “Ge onaka wane na iwa yaline neukone?” ²¹ ʊei gola ma okanmaine, ʊe qakatak mayakane simileineʊo ramaike, ea wane kop mamaike, paki gola etke qakatak wekuo ʊine ka epuyake, gola mane yemo yeye neninane, ʊo mane yemo yeye yauwinane motkei wane.

²² Kop weku eaka welekatne Anutu eņe okange. Eņe eņine sot osi osiine ea wane kine sikan ongi paki, zominane kine didiwo maki wakongi, detkaikei wane. Ea wane eņe siluņ ņeiwa sot osi osi okankakoi, eņe mo mataliongi midakei wano ņine, ebu seseonge. ²³ So eņe qele ewe zomine maune papaine, ea yaleka ma wakone ņenano qakki wake, ņene wet pese kapkoune, ņenano ņine natne eņe eņane qeli ewe zomine maiki wane mo ewekkoi. ²⁴ Eņe ņene ņedan newanņon okanmaike, Yuda ņei eņane keuo ņineka mida, qelan, Yuda ņadino gemami, eņane keueno ņine weneņ edora newan ņonge. ²⁵ Ea wane Hoseaņo buko iwa yale qeke,

“Nei ņerep naņane biņek mi gemami, na baņ edora rakale, ‘Naņane ņei ņerep.’ Nei ņereppa na eņane mi simin nange, na baņ edora rakale, ‘Naņane wasekopne.’ ²⁶ So matpa diawao edane rakole, ‘Nine naņane ņei ņerep magu midaka,’ yewa eņe baņ mat yewaoka edora rakale, ‘Nine Anutu gegeinerop eņane gipon boraso koune.’ ”

²⁷ So Isaiaņo Israel eņane don iwa yale rake, “Israel ņei ņerep eņe sua leuleu paki kiwet mezeno qalak pamaike, yale okangei, ņo siluņ etkemdenjoka baņ menaņei. ²⁸ Waom eņe baņ don raki qoeki ikopka kepe baņem ņei turuņine ebon wareake.” ²⁹ Ea yemo Isaiaņo don mane mikepka iwa yale rake, ea wane kop, “Anutu Togole welaine oņo doko ņosa natne qeliņņonge ra, yemo ņene Sodom welaine, qelan ņei borikine eņane kop marat kaņem rap, so ņene Gomora

welaine, qelanj nei borikine enane kop okanjem rap, so nene korop siuknjem rap.”

Yuda Nei Eje Menage Koboe Okangeiwane Njanakoi

³⁰ Ea wane nene daleo raikene? Iwa yale, qelanj nei eje menage koboe okangei wane mi soringekoi, no mali malipenane ra more, Anutu wano menage koboe okangoi. ³¹ Pakiso Israel nei Anutuño ma wesake biraonge, eje ra rokop don teweke more, menage koboe Anutu wano okangei wane soringekoi, eje ea mi marat kakoi. ³² Eamo onoka wane? Iwa yale wane, eje mali malipenane rau paki, ea mi okangoi. Eje yaup urata mamaenane ra more okangoi, pakiso eje numao wesi pake, yewao kieene lagulok warekoi. ³³ Ea wane Isaianjo Kristo wane ra more don saenine Anutu wane papiao iwa yale ramaike, “Kau, Na Zion kepe yewao wesi mane motmaile, yewao nei nerek kieene ban lagulok warekei, no nei mane eje detluk kayake, eje mi gamu kayake.”

10

Anutuño Sot Qoe Qoe Wane Numa Ma Wakonge Ea Yuda Nei Eje Qaisikkakoi

¹ Kimakopne, na qomne kotineño yemo nae nei nerek Yuda magukopne eje koso Anutuño ebuki maine menangei! Ea wane na enane Anutu menenka okanmaile! ² Eje zok manerop Anutu qelitrine qekeiwane sorin ge okanmami wane, na ea kaulukmaile, no Anutu wane kine wele ra wakonmaile, eje silunj ea wane kine mi

detluke okanmami. ³ Eje Anutuño ñei koboboine qe enjino biraon okanmaike, ea wane numaine mi detka lukokanmami, paki eje enjene numa bonepene mane ma wakon okanmami. Eso ea wane enje edomka Anutuño ñei koboboine geu enjino biraon okanmaike, ea wane bano mi ge okanmami. ⁴ Kristoño ra rokop don ea ma sariki maki kutno qeoke, ea wane ñei mane enje Kristo detluk kayake, enje sot midaine koboboine Anutu wano birakayake.

Anutuño Ñei Nerep Korop Koso Ebuyake

⁵ Iwa yemo ra rokop don teweke more, Anutu wano menage koboboine gege, ea wane Mosenjo iwa yale qeke, “Ñei mane enje ra rokop donjo daleo okaniakane ramaike, ea koropka okan wareake, enje ban gege marat kayake.” ⁶ No mali malip wane ra more menage, Anuturop koboboine gege ea wane don yemo iwa yale, “Ge gonomka wetnonenjo iwa yale misuk raikene. Maño qeliwo wayake?” Ea yemo Kristo ma kesiakane. ⁷ “Me ge iwa yale misuk raikene, maño qei kepe bano kesiake?” Ea yemo Kristo seu seune enjano ñine iwenka sayakane. ⁸ Ea yemo Anutu wane papiao iwa yale wane ramaike, “Anutu wane don yemo osonono pamaike, piñono so koto ñono pamaike.” Ea yemo mali malip wane don ñene ra okanmaine, yewa. ⁹ Ge piñonenjo “Yesu enje Waom” raikene, so Anutuño enje seu seu ñine ma wirikkaki wisikae wieke, ea wetnonenjo detluk kaikeneo, Anutuño ge ban geuyake, ¹⁰ ñene wetzenjo enje detlukkanjem paki, menañgene, Anutu wano koboine birañoniake,

ɲene pizeŋo mali malipzane kine ra qelaŋanɲem paki, menanɲene. ¹¹ Ea wane Anutu wane papiao iwa yale ramaike, “Ŋei mane eɲe Kristo detluk kayake, eɲe gamu mi marat kayake.” ¹² Iwa yemo ɲei ɲerep koropzane ramaike, onoka wane iwamo Yuda ɲei so qelaŋ ɲei, Yuda ɲadino gemami, ɲene mapo mapokine mi gemaine, Anutu eɲe ɲei ɲerep korop eɲane Waom weku okanmaike, paki ɲei ɲerep diwawa edo eɲane eɲetine ora zazak okanmami, eɲe manerop mosopon okanmaike. ¹³ Ea wane Anutu wane papiao iwa yale ramaike, ea wane kop, “Ŋei ɲerep maɲo Waom wane eɲetine ora okanmaike, eɲe baɲ menage geake.”

Israel Eɲe Miti Don Maine Ea Dere Mi Mogare Arikoi

¹⁴ Ŋo ɲei ɲerep eɲe mi detluk kaikeiwo, yemo eɲe daleo eɲetine maine orakei? Soe eɲe don kisiine ea mi detpi paki, daleo maine detluk kaikei? So don kisiine ea manenɲo mi ra qelaŋangi, eɲe daleo maine desikei? ¹⁵ So don kisi rara ɲei mane mi biraonbi arikeiwo, yemo daleo don kisi maine sua ariake? Anutu wane papiao ea wane iwa yale ramaike, “Donkisi maine kepe baɲem ra qelaŋangei ma sarikei, eɲane kieene yemo wekumane!” ¹⁶ Ŋo eɲe siluɲ don maine yewa ɲei ɲerep korop mi dere ma nogankakoi, ea wane don Isaiano iwa yale rake, “Waom, ɲenane don ea maɲo detlukke?” ¹⁷ Eso yalinane don maine dereretɲo mali malip waraŋkaki sariake, eso don detmaine, eaɲo yemo Kristo wano ɲine sarimaike.

18 No siluŋ na qeson maile, ea eŋe welekatne don maine yewa mi detkoi? O, eŋe mo detkoi, ea wane Anutu wane papiaŋo don iwa yale ramaike, “Eŋane aŋa donenane ukatneŋo kepe baŋem korop ari wareke, eŋane donŋo kepe kino ari lotkewareke.”

19 Na koso manerop qeson maile, Israel ŋei ŋerep eŋe don iwa mi detkoi me? Yale mida! Eŋe mo detlukkoi, ea wane Mosenjo alakan iwa yale rake, “Na baŋ ŋei ŋerep yauwine magu wele mida, eŋe ebuwe ŋine eŋe det worik onikei, na baŋ ŋei ŋerep qela qelaŋine ebuwe, ŋei ŋerep korop ŋine busu lelekei.”

20 So Isaiaŋo yemo didiwo ra wakone ramaike, “Na mi zuaŋnane gekoi, edo maratnangoi, nanjane dere qeson mi okangoi, eŋe wakonongole.”

21 No Israel eŋane yemo iwa yale rake, “Naso kiroroine na meteretkene, aŋa bira wira so don qotkoine mai main ŋei ŋerep, eŋano birakole.”

11

Israel Ŋei Korop Wet Togon Okanbi Anutuŋo Nei Magu Nigmatne Ewekineka Ebuke

¹ Ea wane Na qesonmaile, Anutuŋo eŋine Yuda ŋei ŋerep magukoune qeliŋ onge me? Ea Midakaka! Na iwa na Israel ŋeika, Abraham wane ŋaboine, Benyamin magu eŋane tego ŋine.

² Anutuŋo eŋine ŋei ŋerep magukoune mo qei kino ma wesak onge, eŋe mi qeliŋonge, ŋine Anutu wane papiao don sisine mane ramaike, ea mo detmami, Elaiyaŋo Israel eŋane don ra more Anutu iwa yale olatke, ³“Waom, eŋe geŋane

propet kopɔne engu waremami, paki arata ɲone kitopokeu ketke. Na wekumde iwa gemaile, pakimo eɲe nane more nekukei wane ma zezen nanmami.” ⁴ Raki Anutuɲo don turuɲine daleo mange? “Na ɲei sewen tausen (7, 000) mawaluk one wareonbe, eɲe Anutu isisine Baal wawetene ge more mi meɲenkakoi.” ⁵ Ukude naso iwa yemo numa weku eaka okanmaike, Anutu eɲe ɲei ɲerep magu ewekine ma wesakonge, onoka wane eɲine wet peseinane okange. ⁶ Eɲine wet peseinane yale okanonge, urata mamaenane mi okanonge. Anutuɲo ɲei gege mageenane okanonge ra, yemo wet peseine eaɲo wet pese wele mi okangi rap.

⁷ Pakimo daleo? Israel ɲei eɲe kine kine wele maratkaiki wane zuaɲkakoi, ea mi maratkakoi. ɲei magu nigatne Anutuɲo ma wesakonge, edoka wele maratkakoi. ɲo ɲei magu korop, yemo Anutu wane bokawoka desikei wane, ket wetene wonge wareke. ⁸ Eamo Anutu wane papiao don iwa yale ramaike, ea wane kop, “Anutuɲo wetene ma siukke, dereretene ma wongeke, ea wane eɲe naso iwao deeneɲo pore mi kaikei, me keteneɲo maine mi desikei.” ⁹ So Dawit ɲo rake, “Eɲe maine ɲara ne metpi, leɲone ebukey, eɲe maine kepo ket rasukei, eɲe maine turuɲine eboniake! ¹⁰ Eɲane deene maine pilikeake, paki eɲe maine mi pore kaikei, so romonene ma gulokenom, eɲe ɲibak ɲibak naso banem ge arikey.”

¹¹ Na koso qesonmaile, Yuda ɲei popkukoi, yewa eɲe yaup ket enguki midakoi me? Ea Midakaka! Onoka wane eɲe borikine makoi, ea

wane mena menanjo qelanj nei, Yuda njadino gemami, enano sarike, eanjo Yuda nei ebuki enane dere worik okangei wane. ¹² Yuda nei enane borikinejo kepe banem nei enano miti don wane riwe morian ma wakonge, paki set pelekenejo yemo qelanj nei enano miti don wane morian manerop ma wakonge. Yai, no gemage, Yuda nei koropka wetene main gekei, yemo riwe morian wele ma yaline banj wakoniake!

Anutujo Qelanj Nei Ebuke

¹³ Iwa yemo na qelanj nei njine don njidan maile, na qelanj nei enane aposolo gemaile, ea wane na banj uratanane batne okangale. ¹⁴ Na maine nae wenjem sotakkopne ma ewek onbe, ene njine urata mayakatne makoi, ea wane bailalane okangei, paki enano njine natne maine eweke more, menangei. ¹⁵ Anutujo Yuda nei qelanj ongi, yewanjo kepe banem nei korop ebuki sari Anuturop wet weku okane kima okannagukoi. Anutujo gemage, koso Yuda nei ebuyakeo, yemo banj daleo wakoniake? Ea yemo banj seu seuonjine wisikae gege ea wakoniake?

¹⁶ Bret sisine mane lewine Anutu manikeneo, yemo wele korop yewa eamo enaneka okanmaike. So eki mane wane njodine ea korop Anutu manikeneo, yemo qogine eamo korop enaneka okanmaike. ¹⁷ Oliwa eki sereo motmole ea wane qogine natne dumene ketke, pakimo oliwa eki mane zikotno njine ea wane qoginejo yewao takotkeki, qelanj nei ene oliwa ekiwa zikotno njine yale, wane iwa yemo njine zonom so gege kelokine manerop iwa Yuda nei enerop mamami. ¹⁸ Ea

wane njine eki qogine yale dumene ketkoi, enjane detpi ketki wawaine misuk okangei. Njine daleo maine wawaine okangei? Njine yemo eki qogine mane yale, njido eki njodine mi qesinj kamami, eki njodinejo njine qesinj njunmaike.

¹⁹ No njine silun banj rakei, “Welekatne, no silun eki qogine dumene ketkoi, yemo njenane numa maikei wane.” ²⁰ Iwa yemo welekatne, enj rutupke biraongi ketkoi, yemo onoka wane mida, enj Anutu mi detlukkakoi, ea wane. No njine yemo Anutu detlukkakoi, ea wane enjane gegeo gemami, ea wane wetnjinejo wawaine misuk okangei, ea wane turunjine yemo njine kaet njuniake. ²¹ Anutujo Yuda nej mi seseonge, enj eki qogine wele yale, enj banj sesejuniake, njine yale wetkemami me? ²² Iwao njene Anutu wane wet maepine so wet gerepine ea kamaine. Wet gerepinane wele yemo ket qekoi enjano wakonge, no njine yemo sese njunge. Njine takotke more enjane wet maepoka gekeiwo, yale okan njuniake, no njine ea mi okangei, yemo njine yaleka banj rutupke, biranjungi ket warekei. ²³ So Yuda nej enjane yemo, enj mali malip midaine gege, yewa qelinjka warekeiwo, yemo enj banj koso ebu more alakan metmeteno yewao takot oniake, onoka wane Anutu enj mo eweke more, koso met meteno maine biraoniake. ²⁴ Qelanj nej njine yemo oliwa eki zubaine zikotno njine qogine dumene ketke, yale. Pakimo njibu more, oliwa eki sereo motmole, yewao takot njunge. Yuda nej enj yemo oliwa ekiwa sereo motmole, yale. Wane ea yemo maine ewekine, Anutu enj eki qogine dumene

ketke, yewa ma more koso enjine eki biņekino takotkewe ra, maine takot keake.

Anutuņo Nei Korop Enjane Wetine Pake

²⁵ Kimakopne, yewa eamo don sane wele, njine ŋaņae more njinjine dereretko kito more, dere siukkei wane rawe detpi. Ea yemo iwa yale, Yuda nej enjane wet togonene yemo maine mida, ŋo ea enj yale pawamaņki, baņ qelaņ nej zaleene weneņ Anutu wano sari warekei, Yuda wane wet togonene qoeake. ²⁶ Yale waoken okane more, Israel nej korop enj baņ zinge warekei, ea wane Anutu papiao iwa yale ramaike,

“Nebu nebu nej baņ Zion matko njine sariake, paki borikine korop Yakop wane ŋabokoune enjano njine ma biraki ari wareake. ²⁷ Na enjerop siwa siwap baņ okanikale, paki borikineene ma birawe ari wareake.”

²⁸ Yuda nej enj qelaņ nej njinane rau paki, Anutu wane ŋabakoune okangoi, onoka wane enj don maine ea qeliņgoi, ea wane. Ŋo siluņ onoka wane Anutu enjine wet bonepinane enj enjine kimakoune okangoi, yemo aso ŋabo kopene enjane raki paki, yale okanonge. ²⁹ Anutu enj nej mane ma wakonka more, mosop kayakane raki paki, wetine main qein mi okan okanmaike. ³⁰ Ŋo qelaņ nej njine yemo alakanka Anutu aņaine birakoi, wane ukude yemo njine Anutu wano njine riwe morian makoi, yemo onoka wane Yuda nej enj Anutu aņaine birau paki, wet togon okangoi, ea wane. ³¹ Numa weku eaka, onoka wane njine qom pese maratkakoi, ŋo Yuda nej enj yemo iwa Anutu aņaine biramami, yemo enj yaleka

Anutu wane qom pese maine maikei wane, yale okangoi. ³² Anutu eje nei korop anja bira wira okangei wane, ma togole onge, yemo qom pese korop eje sikan oniakane, yale okange.

Anutu Masiinane So Mitiinane Mawakaikene

³³ Yai, Anutu wane morian i zok manerop kakapa! Dereretine so wet dereretine namunine i zok qeirop! Maño eñane wetinane kine maine ra qelañaniake? Maño eñane numa kine kineinane kine maine desiake? ³⁴ Ea wane Anutu wane papiaño iwa yale ramaike.

“Maño Waom wet dereretinane kine detmaike?

Maño ewekki paki don numa maniake?

³⁵ Maño yeye mane mo eje mange, wane eje koso turunine mainge qolekayake?”

³⁶ Yeye kine kine korop oño ma wakon wareke, so yeye kine kine korop eñano ñine sari waremaike, so eñaneka okan waremaike. Anutu wano yemo kibi qelañanño naso banjem payake banine! Weleka.

12

Ñine Wet Solañine Gege Wane Ra More Seukeakane Detjem Paki Anutu Wane Sunka Manikene

¹ Ea wane kimakopne, onoka wane Anutu wane qom pesek kakapa ñenano pamaike, ea wane na wet qelot don iwa ñine ñidanbe, ñine wet solañine gege wane ra more seukeakane detpi paki solañine gege ea Anutu sunka manbi, eñane qelit qeki kaki menageake. Iwa yemo bakom kito kito welenine maine okankaikei. ² Gege

magenjineŋo kepe iwao ŋei miti midaine gemami, eŋane tanik misuk gekei. Siluŋ Anutu detkau, oŋo kotoŋino don saŋep okanŋungi, wet dereretŋine mainge lukkei. Pakimo ŋine maine ewekeu paki, Anutu wane masi ea detkakei, masi maine, so masi ea Anutu eŋe siminka okanmaike, so masi ea koboboine.

³ So onoka wane mida, Anutu wane bakom lewine midaine na ninge, ea wane na ŋine korop ŋidanbe, ŋine ŋinŋinane detpi, misuk wawaine okaniake. Ea wane turuŋine yemo wetŋine make-sikei, paki wet bonep bonep Anutuŋo mali malip darap ŋibonge, ea wane kopko kineŋine ma we-sake det nagukei. ⁴ Ŋene kebaŋze weku yewao piwitne piwitne kounne yemo loutne. Piwitne loutne iwa eŋe urata kine mane kine mane ma okanmami. ⁵ Yalewaka, ŋene ŋei ŋerep loutne, kebaŋze yemo Kristo wano qeturaŋŋem weku lelemaike. So ŋene korop mane ŋo mane qeturaŋ wareŋem piwitne piwitne eaŋo kebaŋ weku yale okanmaike. ⁶ Anutu eŋe ŋenane wetine suaine pake, ea wane eŋe dereret kine kine ŋebonge, eaŋo eŋine bakom okanmaike. Ea wane ŋene Anutu wane don kisi raikenane, bakomine okanŋonge, yemo ŋene mali malipze mage-maine, ea wane rokopko raikene. ⁷ Qelit qeŋe wane zonom pa ŋebonmaikeo, ŋene qelit qekene. Kito eda edan wane zonom pa ŋebon maikeo, ŋene kito edanikene. ⁸ Ŋei ŋerep natne edan ma togole onikenane zonom pa ŋebonmaikeo, ŋene yale okan onikene. Mane eŋe ŋei natne kito qesiŋ okan oniakane wetke mage maikeo, yemo yabonka paki qesiŋ oniake. Mane eŋe

ɲetne geakane ra mangiwo, yemo eɲe urata togogole mayake. Mane eɲe mauluk mauluk urata mayakeɲo, yemo eɲe wet peseko mayake.

Mauluk Mauluk Wane Don

⁹ Kima mauluk onbe rau paki, solanɔka misuk wet maep korop maulukongei. Masi tanik borikine ea ɲadekkaikei, tanik manik maine ea yemo malilipka gekei. ¹⁰ Njine wet maep gere werep okan nagu more, Kristo wano kima kima okanikei, paki ewe kito kito okan nagukeyi wane sori soringo okanikei. ¹¹ Urata togogole maikei, paki bau wawa misuk okanikei. Wet solanɲine koropɲo Waom qelitine qekei. ¹² Tomaka gege eanɔ wareɲungi, wet peseko gekei, paki wikile qom boriko geu paki, meɲe meɲen urata naso banem ma arikeyi. ¹³ Kimakop njine abon midaine gemami eɲe njinano njine abon natne ebonikei, so ɲei lobo sariu, njine matɲine lalage ebonikei.

¹⁴ Anutu olatpi njingu kito okanikei, ɲei yewa mosop oniake, o, olatpi mosop oniake, misuk soa oniake. ¹⁵ Wet pese okanbi, njine qesiɲ one eɲerop wet pese okanikei, arokeu, njine ɲei yewa qesiɲone eɲerop arokkei. ¹⁶ Njinɲinane njunmaike, kop yalewaka ɲei kimakop njine eɲane njuniake. Njinɲinane detpi misuk wawaine okaniake, ketkele eɲerop kima okane more, urata maikei.

¹⁷ ɲei mane eɲe masi borikine okanɲungi, njine turuɲine masi borikineka misuk okan kaikei. ɲei edo detpi masi maine okaniake, eaka eɲane kaitko okangei. ¹⁸ Yeye kine kine korop oka okan wane kop okanmaike, eaka okane more,

nei korop enjerop kima okane peamgo gekei. ¹⁹ Kimakopne, njine masi borikine okan njunbi, njidomka turunine misuk mapokkei. Ea okangei wane turunine yemo qeligeu, Anutu busuinejo ea makokeake, ea wane Anutu wane papiao iwa yale ramaike, “Sot mako makok yemo nojo makokkale, nojo ban turunine mainge ebonikale, Waomjo ramaike.” ²⁰ Ea wane turunine yemo Anutu wane papiao iwa yale ramaike, “Gejane njabanone enje njara wane seukki, njara gumekaikene, doku wane qomine sererekki, doku mannom neake, yale okane more, ban njaba ea gamu suaine mayake.” ²¹ Borikinejo dektanom ge misuk yuan ganiake, ea wane turunine yemo masi maine so koboboine enjo borikine yuankaikene.

13

Kepe Ware Ware Enjane Bango Gekene

¹ Nei korop enje kepe ware ware enjane bango geu paki, njane tewekkei. Onokawane kepe ware ware ea Anutu midaine mi wakonge. Kepe ware ware urata mama, eamo Anutujo ma wakone, ea motke. ² Ea wane nei mane enje kepe ware ware enjane don qeki paki, Anutu wane don wenenj qeake, nei mane yale okaniake, enje ea wane turunine mama ea maki kutino wayake. ³ Nei tanik manik maine ma okanmami, enje ware ware enjane mi kaeton okanmaiike, nei borikine ma okanmami, edoka kaeton okanmaiike. Ge ware ware wawaine gemami, enjane kaetjone midaine gekenane ganmaiike me? Ea wane

ge tanik maineka okannom, eje ban mawalak ganiake. ⁴ Eje Anutu wane qelit nei, geɲone menage gekenane uratanone mamaike. Nɔ ge borikene makeneo, yemo ge eɲane kaetganiake, onoka wane eɲane borikinane turuɲine giniakane zonom yemo welekatne. Eje Anutu wane qelit nei, ea wane eje Anutu wane busu yewa teweke ma geki paki, nei borikine ma okanmami, eje turuɲine ebon okanmaike. ⁵ Ea wane, ɲine nei wawaine eɲane aɲaene tewekkei, Anutuɲo busuinane turuɲine ɲiboniake, ea waneka mida, ɲinɲine wetɲineɲo ɲidaniake, ea teweke okanikei.

⁶ Kine weku ea waneka ɲine yaleka takis mot okanmami, onokawane kepe ware ware eje Anutuɲo ware ware urata makei wane ra ebongone, eje urataene ma okanmami. ⁷ Ea wane ɲine qoleonbi, eɲane binjek onokaka magemami, ea takis qoleongi wane raraine, eje takis qoleonbi, ewe kito kito wane, eje eweene kitokei, bakom kito kito eje korop bakomene kitokei.

Kima Kima Gemo More Wet Maep Okanagukene

⁸ Nei mane wano ɲine sota misuk okanikei, sota weku okanikei, yemo ɲine ɲidomka wet waep okan nagukei. Mane eje nei kimaine wet waep okan kayake, eje Mose wane ra rokop don korop ea tewekeake. ⁹ Ra rokop donɲo iwa yale ramaike, “Zokit misuk kitasikene, nei misuk qenom seukeake, kobu misuk makene, nei mane wane toran abonɲinane qomɲone misuk riweake,” don iwa korop, so don natne yewaɲo qepotkeki, ra rokop don weku okanmaike, yemo

iwa yale, “Geŋonane simile ganmaike, yale waka ŋei kimaŋonane simile ganiake.” ¹⁰ Mane eŋe ŋei kimaine wet waep okan kayake, eŋe tanik worik mane mi okankayake. Wet maep okankayake, oŋo yemo ra rokop don korop tewekwareake.

Kaiwe Suaino Bororom Gekene

¹¹ Iwa ŋine okangei wane ramaile, yemo onoka wane mida, ma naso okanmaike, ea ŋine mo detmami. Ŋine kuluo ŋine wisikae wiekei wane naso naso mo kapele sarimaike. Ŋene musenka don maine detlukkone, yewao Anutuŋo baŋ ŋebuki menaŋgenane naso weti kiroine pake, wane iwa yemo mo osop osop bomile sarimaike. ¹² Goiŋ mo mida leleakane okangimo, kaiwe mo sirikeakane okanmaike. Ea wane ŋine panaman wane aboŋ ea qeligenem paki, tebe ŋoroŋ qelaŋango yaku yaku ea ma wie magekei. ¹³ Ŋene ŋedomka numaze mauluke more, ŋei kaiwe qelaŋano gemami, eŋe yale gekene. Ŋene wawaine, me doku togole ne qelaŋ qeŋe ea mi okanikene, wenip yau yaup, me bailalaŋ mado madoŋine mi okanikene, kawali qeŋe, me lia liak mi okanikene. ¹⁴ Ŋo Waom Yesu Kristo wano ŋine kawali wane aboŋ eaŋo takotŋine okangi ma okorakei, paki solaŋinane dereret borikine ea wane simile misuk desikei.

14

Kimaŋonane Kine Misuk Mapoke Desikene

¹ Ŋei mane mali malipine pelekakatne keu ŋino geake, eŋeka kima okan kaikei, ŋo dereretine yeye natne ea wanemo misuk aŋa sorin

okankaikei. ² Nei weku wane mali malipŋo raki, eŋe ŋara kine mane kine mane nemaikē, ŋo ŋeiwa mali malipine pelekakatne, eŋe yemo zagukka weku ne okanmaikē. ³ Nei mane yeye kine kine yaup qazan neake, ŋo ŋeiwa titiinerop okane more zagukka neake, eŋane mi detki kesiakē. Paki ŋeiwa zagukka weku ne okanmaikē, oŋo ŋeiwa yeye kine kine yaup qazan ne okanmaikē, eŋane mi detki boriki kineine rapokeakē. Onoka wane Anutuŋoka ŋei ea mo weneŋ make so koboboine birakakē, ea wane. ⁴ Ge maŋo, ŋei mane wane qelit medep wane miti ma gegeinane kine raikene? Ea yemo eŋine Suaineineŋo desiakē, eŋe maine ma togole ma okorayakē, me peleke qelikeakē. So eŋe baŋ ma togole ma okorayakē, onoka wane Waomŋo eŋe qesiŋkaki togole okorayakē.

⁵ Nei manēŋo wetke rayakē, kaiwe mane eaŋo wele, ŋo natne yemo kaiwe yauwine. Raki ŋei manēŋo wetke rayakē, kaiwe ea, korop kopene weku, soda peada mida. Nei wet bonēp bonēp detlukeu paki, maine rau rap. ⁶ Nei mane eŋe kaiwe mane wane detki wawaine okaniakē, eŋe Waom ewino kitoki paki okaniakē. ŋo mane eŋe yeye kine kine yaup qazan neake, eŋe Waom ewino kitoki paki okaniakē, onoka wane eŋe ŋara wane Anutu bakomine kitomaikē. Mane eŋe yeye kine kine yaup qazan neakane walukmaikē, eŋe Waom ewino kitoki paki okanmaikē, paki eŋe Anutu bakomine kitomaikē. ⁷ ŋenano ŋine manēŋo eŋineneka weku mi gemaike, ŋenano ŋine manēŋo eŋineneka weku mi seukmaikē. ⁸ ŋene gege gemaine, yemo Waom wane gemaine,

so nene seu seu seukmaine, ea Waom wane seukmaine, Nene gemaine me seukmaine, ea, yemo Waom wane ka okanmaine. ⁹ Kristo eje seukke paki koso wisikae wieke, yemo eje wisikaune so seu seune nenane Waom okaniakane. ¹⁰ Ge, pakimo ge onoka wane kimañonane kine wakoñiakane dongo birakamaine? So ge, onoka wane ge kimañonane detnom ketkele okanmaike? Nene korop bañ Anutu wane kaitko okorañem, eje kineze mawakoniake. ¹¹ Ea wane Anutu wane Papiao iwa yale ramaike,

“Waomño ramaike, na gege kine welaine, ñei korop nañane kaitko wawetene qekei, so ñei korop eje bañ nañane Anutu raikei.”

¹² Ea wane korop ñenano ñineño bañ weku weku gege magezane kine rapoke Anutu olasikene.

Ge Kine Kine Mane Okannom Eaño Kimañonane Wetne Mi Mataliake

¹³ Ea wane nene nedomka kine rapo rapok eamo mi okanikene. Ea wane turuñine yemo ge iwa yale maine okannom rap. Yeye mane okannom eaño kimañone mapapkaki mi rasuyake, me warañkaki borikine mi mayake. ¹⁴ Na Waom Yesurop gemaile, eaño kine nolatki detlukmaile, yemo ñara kine kine mane oñomka diinerop mi okanmaike. No ñei mane eje kine kine iwa qazañ ne more dirop okanikene, yale detlukki paki siluñ neake, eje welekatne ñei ea eñano dirop okaniake. ¹⁵ No ge kimañonane wetne matali kamaine, yemo onoka wane ge kine kine nemaine eaño, ea wane ge koso wet waep numao mi gesoke okoramaine. Ge ñara nekene eaño,

ņeiwa Kristoņo eņane ra seukke, eņane wetine mi matali kayake! ¹⁶ Nįine yeye wele ma gemami, ea ņei natneņo don wele ea, gotkoine orakeiwane warekau paki ma gekei. ¹⁷ Nįara nemaine so doku nemaine, eaņo Anutu wane gege togon numa so gege ea wane wele mi okanmaike, Midakaka. Wele yemo koboboine, peam, so oi bakom, ea Asu Koboboineņo ņebonmaike. ¹⁸ So ņei mane eņe Kristo wane urata numa yewaokengo okora mamaike, yemo eņe Anutuņo ņei ea wane kine detki siminkayake, so ņeiņo weneņ eņane masi kau paki, siminonikei.

¹⁹ Ea wane ņene tanik manik maine waraņ kaki, peam sari okanmaike, so kito qesiņ okan nagukene, ma togoleņon okanmaike, ea wane korop naso baņem wetze eaka more gekene. ²⁰ Onoka wane ge ņara wane ranom paki, Anutu wane urata misuk matalikene. Nįara korop ea maine nenineka, ņo na siluņ ņara mane newe pakiso, ņei kimane ka detki, wetine boriake, na wet masuik urata mamaile, so naņane masi ea mi kopke-maike ²¹ Masi maine okanikenane yemo ge soep mi nekene, walukkene, wain mi nekene, me kine kine natne okannom, yewaņo maki kimaņone baņ rasuyake, ea misuk maikene. ²² Ea wane ge mali malipņone ea magekenane detmaine, yemo Anutu wane kaitko magenom, geņonoka payake. Nįei mane eņe yeye mane wane detki maine okangi, wetineņo qeguņ maguņ mi okangi maineka mamaike, eņe wet pese detmaike! ²³ Nįo eņe kine kine ne okanmaike, ea wane wet etkeka okaniakeo, eņe koso kine kine ea neki, Anutuņo detkaki sot korop okanmaike, onoka wane eņe

mali malip kutno ea mo okanmai ke ea wane. So yeye kine kine natne mali malip kutno mo okan maine ea yemo borikine okanmai ke.

15

Yesu Wane Kop Okanjem Njei Natne Edo Njonbi Menageake

¹ Nene mali malipze togole pamaike, nede njei zonomene midaine set pelek gemami, eje qesin one, umatene teweke kau bisi ebukene. Nene nenzaneka simileze misuk desikene. ² Ea wane turujine yemo nene bonep bonep kimakopze enane dereret ge more, gegeene menageakane, so mitiwo togoleu, mali malipene suyakane mapik onikene. ³ Kristo eje eninaneka simileine mi detke. Enjaneka desiakane turujine yemo Anutu wane papiao don mane iwa yale ramaike, ea wane kop okange, “Anutu, netko liko liko okangangoi, njeiwa yewa enane netko liko liko, eajo nanane kutro wamaike.” ⁴ Don kine kine korop Anutu wane papia mo qewarekoi, eje ea qekoi yemo nene miti wane kine kito nedangi detlukkenane. Paki eajo ma togolejone more, ma ewek njongi, kine kine bijek qe nebonge, ea wane dereret gekenane, qekoi. ⁵ So Anutu eje ma togole ma togole, so ma ewek ma ewek welaine, onjo maine qesinjungi, njine Yesu Kristo wane rokopko, wet dereret weku motpi paki gekei, ⁶ paki njine korop maine aja weku qeturageu paki, Anutu so Waomze Yesu Kristo wane Magaine bakomine kitokei.

Kristono Yuda Nei So Qelan Nei Weneŋ Qe-sinonge

⁷ Ea wane ŋine wetŋineŋo mali malip okan nagu gekei, Kristo eŋe yaleka Anutu wane qeli ewe zonom qelanŋan wakoniakane ŋine ŋibuke.

⁸ Na ŋidanmaile, yemo onoka wane Kristono Yuda nei eŋane qelit nei okangi, eaŋo kine qeki wakonmaiŋe, yemo Anutu eŋe qom pese welaine, paki, eŋe Anutuŋo aso ŋabo biŋek don edange, ea ma togoleki, wele wakoniakane, yale okange.

⁹ So eŋe yaleka qelan nei mapikongi, Anutu qom borikinane bakomine kitokei wane, yale okange. Ea wane Anutu wane papiao don qekoi, eaŋo iwa yale ramaike,

“Eso ea wane na baŋ qelan eŋane keueno geŋane bakom kitokale, na baŋ eŋet kito geŋane eŋetŋone mawa ganikale.”

¹⁰ Koso mane iwa yale ramaike,

“Batne okanbi, qelan nei ŋine, Anutu wane nei ŋerep Yuda magu eŋerop!”

¹¹ So mane iwa yale,

“Waom mawakau, qelan nei korop, eŋe mawakau, nei ŋerep korop!”

¹² So Isaiaŋo koso ramaike,

“Yese wane komine mane baŋ sariake, eŋe baŋ nei waom birakaki, qelan nei wareoniake, paki eŋe baŋ wetene eŋano more gekei.”

¹³ Anutu dereret wane namuŋ, oŋo eŋe detlukka gekeiwane kotoŋino oi bakom so so wet pese, maine qewatŋuniake. Paki Asu Koboboinane zonomŋo baŋ dereretŋine ma togoleki takotke sua ariake.

Paulo Urataine Make Ea Wane Wet Pese Okane Kibi Qeke

¹⁴ Kimakopne, na nonom wetnejo mo more, kinejine detwaremaile, njinano mauluk maulukjo watke pamaike, njine dereretjo korop gewat njunge, ea wane njine njidomka maine ewekeu paki, kito alat nagukei. ¹⁵ Njo silun kibi iwa menjino kito rakake qemaile, yemo miti wane wetke njibone more, wet qelot okan njunmaile. Na wet qelot okan njunmaile, yemo onoka wane Anutujo miti urata ea makalane more ninge. ¹⁶ Ea wane na Kristo Yesu wane qelit nej gewe paki, qelan nej enane urata mamaile. Na pris yale Anutu wano njine miti don maine ea ra qelanane edanmaile, yemo qelan nej ene maine bakom yale okanbi, Asu Koboboinejo ebuki koboeu, Anutu wano bakom yale biraongi, ongi menageake. ¹⁷ Ea wane na Kristo Yesurop wenej urata mamaile, ea wane na maine Anutu wane urata mamaile, ea wane detpe, wawaine okaniake. ¹⁸ Na yeye kine kine natne ea wane don mi raikale, midaka. Na kine kine weku ea wane donka raikale, yemo Kristojo na qesijnangi, nonjo qelan nej iwenonbe, ene Anutu wane miti don dere tewekkei wane, na ananejo so metenejo urata makole. ¹⁹ Asu zonom ningi paki, na masi togole kine mane kine mane ma more yale zonom gorop gekole. Pakiso na kieke Yerusalem kepeo njine Kristo wane don maine ea kepe lolike ra sua ari magewe Ilirikum rokopkeke. ²⁰ Nanane urata yemo naso banem miti don maine ea ra suawe mat natne Kristo wane don kisi mi det okangoi, edo

desikei. Eso yale okane mo, ɲei natne edo urata wele nago nagon matokoi, yewao mi makalane nan okanmaike. ²¹ Yale okanbe Anutu wane Papiango don mane iwa yale ramaike, ea wane kop okanmaike,

“Ñei yewa eɲe eɲane don kisi mane mi rau detkoi, eɲe baɲ kaikei, so yewa eɲe mi detkoi, ɲo baɲ kine detlukkei.”

Paulo Eɲe Roma Matko Ariakane Rake

²² Kine ea wane, na atak loutne ɲinano sarikalane okanbe luknangi met okanmaile. ²³ Na koma loutne ɲinano sari ɲunikalane zok nange, wane ukude iwa yemo kepe iwao uratane mo korop qoe waremaike. ²⁴ Na mo ɲinano ari ea okanikalane iwa wetkemaile. Na eaka sari ɲune mo koso numane leleki Spain kepeo arikole, na ɲinano lotke marat ɲunbe, mere wetne peseki, ea wane ɲadino ɲido qesin nanbi, yewa arikale. ²⁵ Naso iwa yemo Anutu wane ɲei ɲerep yewa gemami, eɲane qelit qe more qesin onikalane, Yerusalem matko arikalane okanmaile. ²⁶ Makedonia so Akaia doku tau tau magu eɲe Yerusalem matko ɲine Anutu wane ɲei magu eɲane keuo ɲine aboɲene midaine gemami, eɲe kito qesin okanone more, bakom more ebonikei-wane, done mo au ma togolekoi. ²⁷ Eɲe edomka ea okangei wane ongi okanbi menange. ɲo siluɲ eɲe sotaene pake, ea wane eɲe aboɲene midaine yewa qesinongoi, Yuda ɲei eɲe kotoenane morian yewa qelaɲ ɲei eɲerop mapoke ama nagukoi, eso ea wane qelaɲ ɲei eɲe yaleka solaenane morian yewa Yuda ɲei eɲerop maine

mapoke ama naguwi menageake. ²⁸ Na urata iwa ma warewe goe wareake. Paki na kaikale, eje wesi suaine enjane ra qeturangoi, ea wele mo maine wakonmaike, yemo na urata ea mo koboine meteenos mosikale, na Spain arikalane yemo na numane eaka sari njunemo, ban arikale. ²⁹ Na njinano sarikale, ea yemo na mo detmaile, na Kristo wano njine mosop kelarop wat watko yewarop ma sarikale.

³⁰ Kimakopne, na Waomze Yesu Kristo wane so Asujo wet waep njibon okanmaike, ea wane wet gelot njidanbe. Njine nanjano takotkeu paki, Anutu mejenka more, nanjane gege uratanane mapik nanikei. ³¹ Mapiknane mejenkau, Anutujo Yuda kepeo jei jei mali malipene midaine enjane meto maineka warenaniake, paki na Yerusalem matko njine Anutu wane jei njerep magu yewa gemami, enjane wet pese wane bakom ebonbe, eje maine maikai, ea mejenkaikai. ³² Ea wane Anutujo detki maine okaniakeo yemo Na ban wet peserop njinano sarikale, paki njinerop metpe wet solane peseake. ³³ Anutu, njenane peam wane welaine, ojo njinerop korop ge wareake. Weleka.

16

Paulo Eje Roma Matko Kima Kima Gekoi Enjane Oi Bakomene Okange

¹ Na kiaroze Pebe, eje Senkria doku tau tau magu mapikone gemaika, enjane njidanmaile. ² Eje u lotkeki, njine Waom wane ra more Anutu wane jei njerep gemami, ea wane eje ma more ma suatkaikai, so eje njido qesinj kaikai wane

ɲaɲaeki, ɲine zonom natne maine qesiɲkaiki. Onoka wane ɲerep ea eɲe ɲei ɲerep loutne kima maine okanonge, so na yaleka okannange.

³ Na oi bakom okanbe paki don motpe Prisila so Akwila, urata ɲei kimatkene, Kristo Yesu wane urata mapiknan okanmamik, erano arimaike ea etanbi. ⁴ Ere naɲane ra more gege etne qaisik kakoik, ea wane na erane wet menaɲ detore gemaile, so noɲoka weku Midakaka, qelago ɲine doku tau tau magu korop eɲe weneɲ erane wet menaɲ detotmami. ⁵ Oi bakomne ea yaleka doku tau tau magu, erane matko lewaɲ okanmami, eɲano weneɲ motpe arimaike, ea weneɲ edangei.

Oi bakomne motpe kima maepne Epainetus eɲano arimaike, ɲei weku eɲe Asia provins ea ɲine, oɲo lewine Kristo detlukkake. ⁶ Oi bakomne motpe Maria wano arimaike, eɲe ɲinane urata togole zok make. ⁷ Andronikus so Yunias erano oi bakomne motpe arimaike, Yuda ɲei agotkene, ere mulap urumgo narop weneɲ metkoi, ere aposolo eɲane keueno eɲetne pamaike, so eto alakane Kristo wane miti don detkoik, na erane ɲadeetno detkole.

⁸ Naɲane oi bakomne motpe Ampliatus wano arimaike, naɲane kimamaepne, Waom wano tako raketse pamaike. ⁹ Oi bakomne motpe Urbanus wane arimaike, ɲenane urata ɲei kimaze, Kristo wane uratao mapiknagukone, so Stakis, kima maepne, eɲano weneɲ motmaile ¹⁰ Apeles wano oi bakomne weneɲ motmaile, eɲe Kristo wane ɲei wele ea wane welaine mo wakonge. Oi bakom ne motpe Aristobulus wane rem qiekoune eɲano arimaike. ¹¹ Herodion wano oi bakomne

motpe arimaike, eņe Yuda ņei kimane, so miti dereret kimakopne Narsisos wane rem qiekoune eņane weneņ motmaile.

¹² Naņane oi bakomne motpe Tripina so Triposa erano arimaike, ere Waom wane urata togole mamamik, so kima maepne Persis, eņe Waom wane urata zok manerop make, eņano weneņ motmaile. ¹³ Na oi bakomne motpe Rupus wano arimaike, eņe ņei maine, Waom wane urata mauluke maki paki, ea mogare ge okanmaike. So eņane nagaine, eņe na eņine gipole yale bororom okannange. ¹⁴ Na oi bakomne motpe Asinkritus, Plegon, Hermes Patrobas, Hermas, so doku tau tau magu natne korop kimakopene eņerop gemami eņano arimaike. ¹⁵ Pilologus, so Yulia, Nereus so kiarine, Olimpas so Anutu wane ņei ņerep magu eņerop weneņ korop gemami, ņinane oi bakomne motpe sarimaike.

¹⁶ Kima gege wane oi bakom eano lulu zam zam okan nagukei. Kristo wane doku tau tau magu korop gemami edo oi bakomene korop ņinano motpi sari waremaike.

Miti ņei Isisine Eņane Girem Rake

¹⁷ Kimakopne, na qebin ņunmaile, ņine ņei natne ņinano qepok mapok don okanbi, ņinano pori porip wakoniake, so ņei natne mali malipene ma qororoņgei, ņei yewa eņane diam seleleine maiki, eņe miti don kito ņibongoi, yewa ņabakau paki, wetņine mau siukeakane, eņe kakakone kaet arieki. ¹⁸ ņei natne masi tanik yaline ma okanmami, eņe Kristo ņenane Waomze eņane qelitine mi qe okanmami, eņe enņene solaenane

simile ea mogat okanmami. Ene donene kelo kelok simile teine raulukeu paki, kelok more, nei maine isione enane dereretene ma siuk okanmami. ¹⁹ Miti don dere tewek maine okanmami, ea wane kisiine ea matko matko ariki, nei nrep koropno detwarekoi, ea wane na ninane wet pese zok detmaile. Na nido dereret korop okane more, kine kine maine ea wane qomnine ewekeake, no kine kine borikine ea wanemo qomnine umareake, ea misuk desikei. ²⁰ Paki Anutu nenane peamzane welaine, ono mi azongi Satan ban ninane kieninane bango ra pelekki kesiake.

Waomze Yesu Kristo wane mosopno ninano payake.

²¹ Timoti, nanane urata nei kimane, ene oi bakomine ninano motki sarimaike, so Lusius, Yason, so Sosipater, Yuda nei agokopne, ene yaleka oi bakomene ninano motpi sarimaike.

²² Na Tertius, kibi iwa Paulo wane anao nine detpe paki, qemaileno doku tau tau oi bakom okanjune more nibonmaile.

²³ Nanane ware ware Gaius, enane matko doku tau tau magu ene lewan okanmami, ene oi bakom okan june more motki sarimaike. Erastus, mat suaine wane wesi mato matok, so nenane kimaze Kuartus, ere oi bakometne more nebonmamik.

²⁴ Waomze Yesu Kristo wane mosopno korop ninano pawareake. Weleka.

Anutu Menjenka More Mawakaikene

²⁵ Nene Anutu enetine ora mawakanem! Ene qesinjune more ma togolejungi mali malipjino

qesoke togole okoramami, miti don maine
n̄idangole, ea wane kopko, don kisi yemo Yesu
Kristo wane, so ea yemo don sane wele, ea
mokaka kine motkeki, naso kiroroine pa sarike,
²⁶ wane ukude yemo don sane wele, yewa mo
propet edo qe more didiwo ma qelanane motkoi
pamaike, paki gege togon Anutu donine rake, ea
wane rokopko ranem sua ariki, kepe banem n̄ei
n̄erep magune magune ge arimami, eñe korop
detwarekoi, ea wane eñe korop maine detluk
kaikei, so tewekkei.

²⁷ Anutu eñe weku, eñe eñineka dereret korop.
Eñano Yesu Kristo wane ra more bakom kito
mawakaikene, naso banem naso banem! Weleka.

Waom Yesu Wane Sigi Maep Don
The New Testament in the Ono Language of Papua
New Guinea
Nupela Testamen long tokples Ono long Niugini

Copyright © 1991 The Bible Society of Papua New Guinea

Language: Ono

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 11 Nov 2022 from source files dated 22 Nov 2019

646541a1-8d36-5993-802c-6bb850da5963